



Archdiocese
OF Wellington



Caulogologo

O MISITELIO O LE MALAMALAMA

OKETOPA 2019

I le masina o Oketopa i le 2002, i se tasi o falesa na ta'ita'iina ai e se tama'ta'isa se losalio ina ua mae'a le Misasa: na ia amata i le vala'auina o tagata o le fa'apotopotooga e tatalo "le misitelio fou" e pei ona talosagaina e le Tamā Pa'ia o Sagato Ioane Paulo II, o ia fo'i na fa'aofī maia le Misitelio o le Malamalama. Se tasi o tinā matua sa i ai na fesili fa'apea, "ua ia ave'esea isi misitelio? E leai. I le tele o seneturi, o le tataloina o le misitelio fiafia, fa'anoanoa ma le mamalu, sa tatou tomanatunatu ai i le tamaitiiti, le puapuagā ma le toetū o Iesu, ua aumai ai le anoanoa'i o tagata ina ia fa'alatalata i le Ali'i, ma ua fa'ailoaina e le Ekalesia lenei faiga i le fa'amanatuina mai pea iā i tatou o le Losalio iā Oketopa i tausaga ta'itasi. O le a la le mea taūa i le misitelio o le malamalama? Pe mana'omia lenei fa'aopopoga i le a'o-ga a Maria e pei ona fa'aigoaina e Sagato Ioane Paulo le losalio, le mana'omia o lenei fa'aopopoga i le polokalame?

I le vaega muamua, manatunatu i le papatisoga o le Ali'i, o lana ulua'i wavega i Kana, lana vala'au ina ia salamō ma galue i le a'oa'oina, o lona afio ai i le mamalu i le Mauga o Tapoa i luma mai o lona Pasio, ma lona avatu o ia lava i lana Ekalesia i le Eukalisitia ua fa'aatoa ma fa'atumulua ai se vaega sa lē atoatoa i le tala ia Iesu. Sa i ai nisi o taumafaiga e fa'alanu nisi o fa'amatalaga o le olaga o le Ali'i na maua mai i misitelio i tu masani. Mai lea taimi i lea taimi, latou e naunau i le losalio sa aumaia ni manatu e fa'aoga mai ai ni vaega o lana galuega tala'i ina ua matua e fesoasoani iā i tatou e fa'aloloto ai o tatou fa'atuatua ma fa'amoemoega iā Iesu ma lo tatou alofa mo ia. Ma o le losalio i lona natura o se ituaiga o tatalo e fetu'utu'una'i. E leai se mafua'aga e lē mafai ona tatou fa'aoga ai so'o se tala a Iesu a o a'oa'o, fafagaina ma fa'amalōlō tagata, ma tomanatu ai i le alofa a o fa'asolosolo vaega o le losalio i o tatou tama'ima'ilima. Pe tatou te filifili e metitasio i faitauga mai le Feagaiga Tuai o lo'o fa'asino iā ia, ni vaega o ona fa'alupega (po'o fa'aupuga sa ia avatu iā ia lava i le Evagelia a Ioane – o le falaoa o le ola, o le vine moni ma isi) po'o ni a'afiaga mai o tatou lava olaga na tautala mai iā i tatou a o afio ai o ia. O nisi ia o auala matagofie o le tataloina o le losalio, ma fa'afeiloa'i mai ai le Misitelio "fou" o le Malamalama e se Pope ua fa'apa'iaina o se sagato ua fa'amalosi'au ai tatou e fa'atupulia ni mea fou iā tatou taumafaiga a o tatou aga'i atu i le fa'atinoina o lenei tapua'iga lauiloa.

Ma e mafai ona tatou metitasio i le misitelio o le malamalama i ni 'aula 'ese'ese. E mafai ona tatou feso'ota'iā latou ta'itasi ma ni tatalo fa'apitoa mo fa'anaunauga: mafaufau mo se fa'ata'ita'iga, o se pepe fou fa'atoa papatiso,

ulugali'i fa'aipoipo, o misionare, Kerisiano ua fa'asauaina, ma ositaulaga a o latou sauniuni e patipatia le Misasa.

Ae ui i lea, o nei misitelio ta'itasi o lo'o fa'aalia maia se mea e uiga iā ia o le autū o a tatou tatalo i so'o se taimi tatou te lauina ai le losalio. O le mafua'aga lea ua ta'ua ai o le malamalama: ua susulu mai ai le malamalama o ai Iesu mo i tatou. O ia o lē na sau e tutū fa'atasi ma i tatou i taimi o tatou mana'oga mo le fa'amalogia a le Atua, fa'ainu i tatou i le fiafia, a'oa'o i tatou i le ala i le Tamā, fa'amafanafana i tatou o le fa'anoanoa e lē o le upu mulimuli lea i o tatou olaga, ma sau e ola i totonus o tatou i le Komunio Pa'ia. E le ave'esea ai se mea mai misitelio "tuai", ae fa'aloloto ai lo tatou talisap-aiā ma le fa'atāuaina o na misitelio. E fesoasoani iā i tatou e va'ai ai i le losalio e pei ona fai mai ai Sagato Ioane Paulo, "o se faitoto'a moni i le loloto o le loto o Keriso, o le moana o le fiafia ma le malamalama, o le puapuagatia ma le mama-lu"


O le losalio o se tasi nei o ituaiga o tatalo ua maoa'e lona matagofie ma le aogā...O Misitelio ua toe fa'amanatu maia le olaga atoa o Iesu ma Maria ma lo la mamalu i le lagi. O misitelio la o le Losalio ua fa'avasega i ni vaega ae 'ese'ese uiga o misitelio tetele o o tatou fa'aolataga: le Liutino, le Fa'aolataga, Ola e Fa'avavau.

O le Losalio la o se ta'utinoga po'o ni ta'iala e fa'atonutonu ai: e le na o se mea i le mafaufau ae o se manatu ua fa'atino mai i le olaga o Iesu o lē na sau ia i tatou mai le Tamā ma o lē na si'itia atu i le lagi ina ia toe aumaia i tatou fa'atasi ma ia i le Tamā. O le matagofie atoa a Kerisiano ma ona mama-lu ma le fa'aeaea, ua aumai iā i tatou ina ia fa'atumulua ai o tatou mafaufau, ina ia tatou fiafia ai ma fafagaina ai o tatou agaga.

O le mea lea ua avea ai le Losalio o se a'oga moni mo tomanatunatuga. Ua si'itia mālie a'e ai i tatou i luga atu o tatalo lē leoa e o'o lava i luga atu o mafua'aga ma metitasio fa'agauloto. O ni 'au fai telosia muamua sa fa'atusatusaina le gaioiga ole agaga i tomanatunatu i le gaioiga a se manulele pe a mana'o e maua le maualuga tele a o lele i le 'ea. O misitelio fiafia ua ta'ita'ia i le Pasio, ma o le Pasio i le faitoto'a o le lagi. A malamalamaina lelei le Losalio, o lona uiga o se ituaiga o tatalo ua si'itia ai uma i tatou ina ia maua avanoa uma ai i nei fa'amanuiaga.

Manuia lenei masina i le tatou savaliga

AFOGA KATINALE JOHN DEW



UŌ PELEINA

I le masina o Setema na te'a atu nei, sa fai ai se fono masani a le komiti a Faife'au. Na amatalia le fonotaga e pei ona masani ai i le tatalo ma tomanatunatuga. O se tasi o sini na talosagaina ai i matou e tomanatu ai i taimi o tatalo "*a o vala'auina i tatou e ta'ita'ia ni suiga tetele i totonu o le tatou Ekalesia nei i Ueligitone, atonu e tatau ona fa'amanatu iā i tatou lava ni moni mā'i'oi'o e uiga i ositaulaga?*" Na mafua ai ona maua se taimi matagofie mo tatalo ma fa'asoa na a'afia ai ma upu na saunoa ai Pope Penetito XVI i lana ulua'i lauga ina ua avea ma Pope: Na foaoaina i tatou i le finagalo o le Atua ma ona o lenei mafua'aga 'o tatou ta'ito'atasi o se i'uga o se manatu a le Atua. "*O tatou ta'ito'atasi ua fa'aoso-fiaina, o tatou ta'ito'atasi ua alofagia, o tatou ta'ito'atasi ua alagatatau.*" Ou te manatu e tatau ona tatou tomanatu i upu nei a Pope Penetito, ona a tatou lē malamalamalama loloto na "*foaoaina, alofagia ma filifilia*" o le a faigatā ona ta'ita'ia i nei taimi o suiga ma lu'itau tetele.

I nai aso ae le'i faia lenei fonotaga sa saunoa ai Pope Faranisisi i ositaulaga ma le 'au fai tofi i lana malaga i Madagascar. Sa ou mafaufau i ana upu a o matou fai talosaga ma tomanatunatua i la matou fa'atasiga. Sa ia fai mai i le aso 5 o Setema: "*Sa ou fiafia i se fa'aupuga a se tasi o Faia'oga Kapite na fa'apea mai: "O tatou o se Ekalesia o vaega o ni tagata totoa". O ni tagata ua mau silafia i puapuaga ae tauave pea le fa'amoemoe. Ma lenei loto tele pa'ia ua e avea ou tagata, o se loto tele ua vala'auina se fa'afouga o le fa'atuatua ma le fa'amoemoe, ma o tatou uma i aso nei ua manana'o e fa'afou la tatou "ioe." O le a fiafia le Ekalesia o se Tinā Pa'ia e fa'alogi iā te oe o fa'aalia lou alofa mo le Ali'i ma le misiona ua ia avatu iā te 'oe!"*

O se lagona lelei pe a manatu atu o tatou o se vaega o ni tagata totoa. O le a le uiga o lenā mo 'oe? O tatou o ni tagata ua a'afia i ni puapuagatia, ae sa tatou tauave pea le fa'amoemoe. O a mea tatou te faia o ni tagata ta'ito'atasi ma fa'atasi ai ma a tatou fa'apotopotoga ina ia fa'aolaola pea le fa'amoemoe? Ua vala'auina i tatou e fa'afou o tatou fa'atuatua ma fa'amoemoe, ma tatou te manana'o e fa'afou a tatou "ioe?" Ua fa'amanatu mai e le Tamā Pa'ia le fiafia o le **Ekalesia o se Tinā Pa'ia e fa'alogi mai o fa'ailoa o tatou alofa mo le Ali'i ma le misiona ua ia tu'uina mai ia i tatou".**

O le a lau misiona?

E fa'apefea ona ola ai lau misiona?

E fa'apefea ona tatou galulue fa'atasi ma lagolagosua le tasi i le isi iā tatou misiona?

Fa'amolemole manatua ma tatalo i upu "*o tatou ta'ito'atasi o ni i'uga o le finagalo a le Atua. O tatou ta'ito'atasi na foaoaina, o tatou ta'ito'atasi na alofagia, o tatou ta'ito'atasi e alagatatau*"

Ma Fa'amanuiaga uma Lava

+ Ioane

O LE TAŪA O LE MEA'AI

.....fa'aauau mai lomiga taluai.....

O Evagelia e fa ua ta'itasi ma ta'ua le mea'ai o le Paseka. I le afiafi ae le'i faia le Paseka, na fa'asoa ai e Iesu ma ona so'o lana mea'ai mulimuli, na lauiloa o le Tausama'aga Mulimuli. A o faia le mea'ai na tu'ua e Iesu faiga masani. Muamua, na fa'ailoa mai e le Evagelia a Ioane na mulumulu e Iesu vae o ona so'o o se fa'ailoga o le 'au'aunaga, lona lua, le Evagelia a Mareko, Mataio ma Luka o lo'o fa'apea mai na tofitofi e Iesu le falaoa, fa'ailoa mai ai o lona tino ua avatu iā i latou, ma na ia fa'apa'ia le ipu uaina ma fai atu o le feagaiga fou i le va o ia ma latou. O lenei sauniga o le amataga fa'atauvau'a lea o le sauniga fa'aeukalisitia a Kerisiano.

I le mae'a o le maliu ma le toetu o Iesu, na fa'aauau e

ona so'o le potopoto fa'atasi mo le mea'ai o le fa'aaumea, ua fa'amanatu ai mea na tutupu fa'atasi ma la latou mea'ai Paseka mulimuli ma Iesu ma lona puapuagā, maliu ma le toetū. I le toe fa'amatalaina o mea na tutupu ua le gata o le toe fa'amanatu o le taimi sa latou fa'aalu ma Iesu ae na latou a'afia ai le Mesia toetū. O le folafolaga o nei mea na amata ai le fa'aopopo mālie ma to'atele ai latou sa mulimuli iā Iesu, ma o le tutotonu o nei mea na tutupu i olaga o le 'au so'o na i'u ona avea vave le mea'ai fa'apotopotoga ma sauniga autū o a latou potopotoga.

I le 1 Korinito 10 – 11, o lo'o fa'amanatu ai e Paulo iā Korinito o le mea'ai o lo'o latou fa'amanatuina o le 'au ai lea i le tino ma le toto o Keriso. O le mea'ai la o lo'o

O LE TAŪA O LE MEA'AI

fa'amanatu ai le maliu ma le toetu o Iesu. Ae o upu a Paulo e uiga i le Eukalisitia (1 Korinito 11: 23 – 25) e pu'upu'u ma e lē manino lelei. Ua na ona ta'ua o upu a Iesu i luga o le falaoa ma le uaina ma fa'atonuga e faia e fa'amanatu ai Iesu. Atonu o le fa'apu'upu'uga, e ui i lea, ona o le to'atele o Kerisiano o le taimi lea na liliu mai le ituaiga o Iutaia ma na ona fa'amanatu e Paulo iā i latou o suiga ua faia e Iesu i le faiga o a latou fa'amanatuga.

O le fa'aogaina e Paulo o le upu **tino** i nisi o taimi ua fa'asino lea i le falaoa ma o isi o taimi o le fa'apotopotoga atoa. E le o manino mai pe sa talitonu Paulo o Keriso toetu o lo'o afio ai i le falaoa i le 'aula e pei ona ia malamalamaina lelei le afio ai o Keriso i le nu'u ua potopoto (va'ai 1 Korinito 12). O lenei fa'apu'upu'uga ma le lē manino o lo'o maua fo'i i Evagelia e tolu i fa'amatalaga ole Tausama'aga Mulimuli (Mataio 26: 26 – 29, Mareko 14: 22 – 25 ma Luka 22: 14 – 20).

O lo'o i ai fo'i ma se finauga i le uiga o upu o lo'o fa'aoga i Evagelia. O fa'aupuga fa'amaumau, 'O lo'u tino lenei...O lo'u toto lenei'. O Evagelia sa tusia ile gagana Eleni, ae ona o Iesu sa tautala ile gagana Iutaia atonu sa fai mai, 'O lo'u tino...O lo'u toto', e aunoa ma le upu "lenei". E ui o ulua'i Kerisiano sa fa'ailoaina le falaoa ma le uaina fa'atasi ma le tino ma le toto o Keriso, e le mafai ona fa'amaonia o le malamalamaga lenei a Iesu ma latou sa mulimuli iā te ia. E masalomia fo'i e le'i faia e latou lenei fa'aupuga e feso'ota'i ai fa'amanatu ona o le inuina o le toto e le taliaina i le tu ma aganu'u ma e fa'asā i le talitonuga a Iutaia. (va'ai Levitiko 3: 17, galuega 15: 29).

Ae ui i lea, o le 'au Iutaia, ia latou sauniga fa'amea'ai e 'a'ai i mea'ai fa'afa'iloga. O laula'au feū ma falaoa lē fa'afeftetea o le pasuka o nisi ia o fa'ata'ita'iga. Atonu sa fa'aoga fa'ailoga a tu masani o ia faiga'ai ma avatu ai i le falaoa ma uaina se uiga fou.

E le o ta'ua le falaoa ma le uaina i le Evagelia a Ioane po'o upu a Iesu i luga o ia mea. Ole Evagelia lenei na tusia pei o le 90 CE, o le Evagelia mulimuli na fa'amautu mai, masalo sa va'aia se suiga i le alualu i luma o le malamalamaga a le fa'apotopotoga i le sauniga o le tausama'aga pa'ia. O lē na tusia le Evagelia a Ioane o lo'o fa'ailoa maia le falaoa ma le uaina i le Ioane 6, o lo'o a'afia ai ma le fa'amatalaga o le fafagaina e Iesu o le lima afe ma ta'ua ai le Falaoa o le Ola. I le fa'ai'uga ole seneturi muamua, pe le'i muamua atu fo'i, o le tele o Kerisiano ua amata ona malamalamaga ile afio tonu ai o Keriso toetu i le falaoa ma le uaina.

O le mea'ai ua lē na o le pau lea o le fa'auigaina o le sauniga o le Tausama'aga Mulimuli. Sa iai fo'i ma se talitonuga o le maliu o Iesu o se faitaulaga, o se taulaga i le Atua mo le fa'aolataga o tagata uma. O lenei manatu o le sauniga o le eukalisitia o se faitaulaga sa taūa tele ma na avea ma se malamalamaga tele o le Eukalisitia i telosia a Kerisiano anamua.

Ina ua mou atu le mea'ai fa'a'amea, na tumau le **mea'ai fa'afa'iloga** ae ua ta'ua o le Eukalisitia e le 'au Kerisiano tusitusi i le seneturi lua. I lenā lava taimi o tatalo i taeano i le Sapatia a Iutaia, e 'a'afia ai le fa'afeiloa'iga amata, o faitauga mai le Tusi Pa'ia, ma ni a'oa'oga mai faitauga, tatalo laua'itele ma se fa'apa'iga mulimuli, i nisi o taimi, sa fa'aofii i le amataga o le Eukalisitia. O nisi o taimi o le suaniga o tatalo sa 'ese taimi e fai ai. E o'o atu i le seneturi tolu ua i ai fa'amaoniga sa potopoto Kerisiano i vaega laiti i aso ta'itasi e patipatia le Eukalisitia i se feso'ota'iga ma faigā mea'ai na fa'asoa i afiafi.

I le tolu o seneturi muamua, na suia mai le patipatia o le eukalisitia mai se mea'ai fa'a'amea i se mea'ai fa'asauniga fa'atasi ai ma se fa'auigaina na tuputupu mālie o se faigataulaga. O tatalo na soso'o sa mulimulita'i i faiga masani fa'atatalo fa'afetai Iutaia sa leai se fa'asologa mautū vaganā upu masani (O lo'u tino lenei...O lo'u toto lenei).

I le seneturi lona lua o le fa'ailoaina i le va o le falaoa ma uaina ma le tino ma le toto o Keriso na amata ona ola ina ua malamalamaina o Keriso e le gata o le ositaulaga na ofoina le taulaga ae o ia fo'i na osia ai le taulaga.

I le tolu o seneturi muamua la o le 'au tusitusi o lea vaitau na malamalamaina le Eukalisitia e le na o le fa'amatalaina ole tu'u fa'atasia o Kerisiano ae o le punava'i o le tu'u fa'atasia o Kerisiano. Ua latou lagonaina le afio ola ai o Keriso ona ua latou talitonu ai, ma na latou talitonu ai ona na latou lagonaina.

E pei ole 'au malaga i le 'aula i Emau (Luka 24: 13 – 35) ua vala'auina i tatou i se faiga'ai, ma, e pei o la'ua ia na fa'atasi ma ia i le laulau, ua iloaina o ia i le tofitofiga ole falaoa. O le mea'ai o se fa'ailoga teuteuina tūtotonu lea e feiloa'i atu ai i le Atua. O le nofoaga o le feiloa'iga, o lo'o lagonaina ai le Atua ae lē taofia maia. O le mea'ai e aumaia se fa'aaliga. O le patipatia o le faiga'ai, le tofitofiga o le falaoa ma taliaina o le mea'ai o vaega uma nei o le elemene e tasi. Punavai ma le fa'aliga moni o le tapuaiga. O le malamalamaga moni i le Eukalisitia e amata i le gaioiga o le potopoto, tatalo, tofitofiga ma le 'a'ai. O mea nei e fa o vaega taūa nei o le manatu i le Eukalisitia o se mea'ai ma se faiga o tapua'iga. I le tulaga i faiga'ai, fa'asoa ma tatalo fa'atasi, ua mafai ona tatou fa'amatalaina ai le Eukalisitia o se gaioiga, o se fa'amanatuga (*zikkaron*) ua fa'amausalī ma fa'amautuina.

.....fa'aauau pea.....



'IA VI'IA 'OE'

(LAUDATO SI` - Pope Falanisisi)

Fa'aliiliuina: Falefou Sio

III. O FITĀ MA A'AFIĀGA O LE TAGATA I ONAPŌ NEI.

115. O le tagata i aso nei, ua fete'ena'i ma o'o atu ai ina si'iitia manatu i tomai fa'apitoa ma ufitia ai le mea moni, talu mai "le mafaufau fa'ate-konolosi ua va'ai ai i le natura o se poloā'iga mate, e pei o se tino mālūlū o mea moni, e pei e māmā lona 'tu'uina mai,' e pei o se mea na ona fa'aaogā, pei o se mea faitino ua sāmalaina e avea o ni fa'atusa aogā; e talitutusa le tilotilo i le atulaulau e pei ua na'o se 'ta'alaelae' e mafai ona lafoā'i i ai mea faitino e aunoa ma se popole i ai." O le mama-lu tōfia o le lalolagi ua fa'apena ona suia. Ina ua lape tagata soifua e sa'ilī o latou tulaga moni i lenei lalolagi, ona lē malamalamā lea o i latou ma i'u ai ina fa'asagatau iā i latou lava: "Ua lē gata ina tu'uina mai e le Atua le lalolagi i le tagata, ina ia fa'aaogā tatau ma fa'aaloalogia mo le mua'i mafu-a'aga lelei lea na tu'uina mai ai, ae, o le tagata foi o le mea'aloa a le Atua i le tagata. O le mea lea e tatau ai i le tagata ona fa'aaloalo i le natura ma le fa'apaēga o amiogatonu ua uma ona fa'aēaina ai o ia."

116. O nei vaitaimi ua fa'ailo e se si'iitiaga fa'aletagata o aso nei, i lalo o se isi ufimata, ua fa'aauau pea ona tū i le ala o le malamalamā fefa'asoā'i ma so'o se taumafaiga e u'una'ia ai fegalegaleā'iga lautele. Ua o'o mai le taimi e totogi ai le gauā'i toe fa'afouina i le mea moni ma tapulā'a na te aumaia; o lea mea i nisi o taimi o se tu'utu'uga mo se leo sili atu fa'apea ni atina'e fuatele a tagata ta'ito'atasi ma le sosaiete. O ni fa'amatalaga lē'a'ua'u fa'a-kerisiano i le tomai su'esu'e tusa ma tagata na mafua ai se malamalamaga sēsē i le so'otaga i le va o tagata soifua ma le lalolagi. E masani lava ona mafuli atu mea i se manatu fa'a-atua aitu o Polōmeto lea ua pulea le lalolagi, ua na aumaia le manatu o le puipuiga o le natura o se mea e na'o le au loto vaivai e popole i ai. Nai lo le tatou "pule'aga" o le atulaulau atoa e tatau ona matuā'i malamalamā lelei i le uiga o le matafaioi tausimea.

117. O le fa'atamala i le mata'itūina o le manū'a ua faia i le natura ma le a'afiaga o le siosiomaga i a tatou fa'ai'uga, ua o se fa'ailoga sili ona mata'utia i le lē amanaiaina o le feau o lo'o i totonus o le fausaga o le natura lava ia. Afai e lē mafai ona tatou amanaia le tāua o le tagata mativa o se vaega o le mea moni, o se tagata ua āfuafua, o se tagata e i ai manaoga fa'apitoa - e ofoina atu na'o ni nai fa'ataitaiga - e faigata ona lagona le tagi a le natura lava ia; o mea uma e feso'otai. O le taimi lava e tautino mai ai e le tagata le tūto'atasi mai le mea moni ma fai amioga ma le pule atoatoa, ona amata lea ona solofa le fa'avae o lo tatou olaga, mo "nai lo le tauaveina o lana matafaioi o se tagata e galulue fa'atasi ma le Atua i le galuega o le foafoaga, ua suia e le tagata ia lava i le tulaga o le Atua ma ua fa'apea ona i'u ai i le fa'aosofia e fouvale i le vaega o le natura."

118. O lenei tulaga na tatā'i atu ai i se gasegase fa'alemafaufau tūmau, o i'inā i le tekonomosi lea e iloa ai le leai se tāua fa'apitoa i tagata maualalo e nonono fa'atasi ai ma nisi mea mata'utia, lea e va'ai i le noa o se tāua fa'apitoa i tagata soifua. Ae lē mafai e se tasi ona ufiufi mai tagata soifua. E lē mafai ona toe fa'afouina le tatou so'otaga ma le natura pe a aunoa ma se fa'afouina fa'aletagata lava ia. E lē mafai ona i ai se si'osi'omaga e aunoa ma se tagata talafeagai lelei. Afai ae manatu le tagata soifua ua na'o ia lava mai le lasi o mea, o le fa'amanuiaga o avanoa po'o fu-afuaga fa'aletino, o le a "fa'aitiitia ai le uiga atoa o la tatou matafaioi." O le ta'ita'iga sēsē fa'aletagata e lē tatau ona fa'aofi atu i isi "meaola," o lea faiga e mafai ona o'o atu ai i se isi tulaga lēmautonu, ma pa'u atu ai i le lēmafai ona foia fa'afitauli o le taimi nei ae o le a toe fa'aopoopoina nisi fa'afitauli fou. E lē mafai ona silamatā'i tagata soifua e lagona le titutetauave mo le lalolagi sei vaganā, i lea lava taimi, i o latou tulaga agava'a fa'alemafaufau, o latou loto, le saolotoga, ma amanaiaina o latou tiute ma fa'atāua.

119. E lē tatau foi ona faitioina le ta'ita'i sēsēina a le tagata soifua ma manatu māmā i le tāua o so'otaga vavalalata fa'aletagata. Afai o le fa'afitauli o le siosiomaga i le taimi nei e i ai sina fa'ailoga o tū ma aga, o aganu'u ma fa'afitauli fa'aleagaga o nei onapō, e lē mafai ona tatou talitonu e fofoina o tatou so'otaga ma le natura ma le siosiomaga pe a lē fofoina uma so'otaga fa'avae fa'aletagata. O le manatu fa'a-Kerisiano e va'ai i tagata soifua pei e umiaina se mamalu fa'apitoa e sili atu ai nai lo isi meaola; e fa'aaogā latou te fa'amemelo ai mo so'o se tasi ma fa'aaloalo ai i isi. O lo tatou tatala i isi, o i latou ia o se "oe" e mafai ona iloaina, alofaina ma ofi atu i talanoaga, ae tumau pea le punāvai o lo tatou tamali'iaga o ni tagata soifua. O se mafutaga moni ma le lalolagi na faia na te fa'atonutonua ma e lē tatau ona tatou fa'avaivai ai i lea tulaga lautele o le tatala atu i isi tagata, ae lē fa'aitiitia ai ona sili atu le tulaga maualuga o lo tatou tatala i le "Oe" a le Atua. O a tatou so'otaga ma le siosiomaga e lē mafai ona

vavae'eseina mai ai lo tatou va ma isi tagata fa'apea ma le Atua. A le'o lea, o le a leai se isi mea e sili atu nai lo le alofa i le tagata lava ia ua ofu i laei o le siosiomaga, ma lokaina i tatou i se malemo tumau.

120. Talu mai le feso'ota'iga o mea uma, o le popolega mo le puipuiga o le natura e lē ogatasi ma le amiotonu i le fa'afafanoina o fanau. E fa'apefea ona moni lo tatou a'oa'oina o le tāua i le popolega mo isi tagata pagātia, tusa lava po'o le a le fa'asoesā ma le fitā e o'o i ai, ae afai tatou te lē mafaia ona pui-puia se pepe ua āfuafua, e tusa lava pe o lona tino mai e lē maua ai le to'afilemū ma aliā'i ai ni fa'afitauli? "Afai o le lagona fa'aletagata ma fa'aagafeso'otai e taliaina le ola fou ua ma'imau, o lona uiga o isi ituaiga o le taliaina lea e fa'atāua mo le lalolagi e fa'apena foi ona mamae."

121. E tatau ona tatou atina'eina se tu'ufa'atasiga fou e mafai ai ona fa'ato'ilaloina ai finauga sēsē o seneturi talu ai nei. O le fa'a-Kerisiano, i le fa'asinomaga i lona agatonu tausi feagaiga ma le teuga 'oa o le mea moni na maua mai ia Iesu Keriso, o lo'o fa'aauau pea ona tōmanatu i nei mataupu i ni talanoaga fuatele mai e suia tulaga o talafa'asolopito. I le faia o lenei mea, o le a fa'ailoa ai se fa'afouga fa'avavau.

.....e fa'aauau pea.....

O Fafine O Le Evagelia O Maria o Petania Tu'utō ia Iesu

Faitau muamua - Luka 10: 38 – 42; Ioane 11: 28 – 45; 12: 1 – 8

E fa'alelava fa'amatalaga e uiga iā Maria o Petania i evagelia, ma o le itiiti o mea e ta'u mai e le 'au tusi Evagelia iā i tatou e masani e fenumia'i ma tala i isi fafine ma Iesu. Ua tatou nofo aitalafu iā Luka ma Ioane ona o mea ua tatou iloaina i lenei fafine. O le tele o lo'o fa'amatalaina mai ana gaioiga ma mea e fai, o lo'o fa'amatala mai lona tu'utō iā Iesu. O se fafine e lē tele ni upu. Ua tatou fa'alogi ile talanoaga a Maretia ma Iesu e uiga iā Maria i le Luka 10: 38 – 42. O le tala i le feiloa'iga a Iesu ma Maria ina ua mae'a le maliu a lona tuagane o Lasalo, o lo'o maua fo'i i le Ioane 11: 28 – 45. Ina ua uma ona toe fa'atu mai e Iesu Lasalo, sa latou 'a'ai i Petania, ma na ū'uina ai e Maria vae o Iesu i se suau'u taugatā (12: 1 – 8). O nei fa'amatalaga pupu'u e tolu e uiga ia Maria o Petania ua maua mai ai se va'aiga mata-gofie i tiute 'ese'ese a fafine a le ekalesia i lona tauamata.

O Luka 10: 38 – 42 o lo'o maua mai ai le vaega o le faiga malaga a Iesu i Jerusalema, o se sini o lo'o fa'amamafa fa'apitoa mai e Luka i le 9: 5 – 19: 28. O lo'o mulimuli iā Iesu ona so'o i se malaga umi i Jerusalema, le nofoaga o le a maliu ai. A o alu lenei malaga, e masani ona va'aia Iesu o lo'o 'a'ai fa'atasi ma ona so'o ma isi, talatalanoa ma i latou, ma a'oa'o atu iā i latou. O nisi o taimi o 'au malaga ua tu'ufesili iā te ia, aemaise lona so'otaga ma tagata e pei o le 'au ao lafoga ma le 'auagasala, o fafine, ma tagata e mama'i ma latou e fa'aletonu o latou tino. Pe o la e savali i le 'aula po'o nofonofo i se laulau, e masani ona va'aia Iesu o tau'ave le tofiga ole ta'ita'i po'o lē talimalō a o ia a'oa'o iā i latou o lo'o mulimuli i ai i le taugatā, o mea e lamatia ai, ma le taui o le fa'aso'oina. O mea ia sa 'a'afia i le talanoaga pu'upu'u a Iesu ma Maretia i uiga o Maria. O le mea ua tupu e mafai ona malamlamaina o se fa'atonuga e uiga i le tiute a se so'o fafine a Iesu.

O Maria fo'i ia sa va'aia lana sao ma le iloa atoa i le tala. O ia na fa'atutū i ai le tomumu a Maretia iā Iesu. E le ta'ua Petania. Ua tatou iloaina o Maria, Maretia ma Lasalo e non-ifo i Petania mai le Evagelia a Ioane. E le o ta'ua e Luka Petania ona o se nu'u ua na o le lua maila mai Jerusalema, ma na ia tu'uina le mea na tupu i le tale a Maretia ma Maria

i luma mai i le malaga a Iesu ae le'i taunu'u i le 'a'ai e maliu ai. Ille va'aiga a Luka, o le nofoaga o lenei talanoaga e le tāua i le tala. O lo'o fa'atuputupu e Luka ni lesona ma ni va'aiga i le natura, mana'ona'oga ma vaega fa'amuamua o le fa'aso'oina e pei ona ia tusia se ata o Iesu a o aga'i atu i Jerusalema.

O se fetufaa'iga pu'upu'u i le va o Maretia ma Iesu e uiga i le matafaioi a Maria i le tausiga o le aiga e talitonuina e tau fa'apupula ai i le 'au fa'apotopotoga a Luka e uiga i tofiga a fafine i le tale tatalo mo le 'au fa'atuatua mo a latou faigatalosaga, tomanatunatuga i mataupu tau le sosaiete, ma a'oa'oga mo le 'au liliu fou. Na tomumu Maretia fa'apea sa tatau iā Maria ona fesoasoani atu i le laulauina o mea'ai i lo le nofonofo i vae o Iesu ma fa'alogologo i ana a'oa'oga. O lo'o fa'apea mai Luka o le faitio a Maretia na sau mai le tulaga "ua tu'u mai e lo'u uso iā te a'u e sauni to'atasi" (10: 40). O le tali a Iesu na fa'amausalī ai le filifiliga a Maria ae o Maretia i le "popole ma ua pūpū lou loto i mea e tele" ae "tasi e ao ina ia maua" (10: 42). E foliga mai e ao iā Maretia ona fuafua lelei ana filifiliga ma ia talia pe sua fo'i. O lo'o manino mai e le o fa'aitiitia e Iesu le tāua o tiute o le talimalō, ona o le mataupu e soso'o ai o le a tatou fa'alogologo ai o ia fa'amatala le tala i le Samaria Agalelei, o lona uiga o le tausiga lelei o isi. Ae musu Iesu e fa'aitu'au iā i latou e fa'amuta le loto fatialia a fafine i se matafaioi e tasi o le "auauna ile laulau" i lo le fa'alogi, manatunatu ma fa'asalalau le upu a le evagelia.

I Mataupu 11 ma le 12 o le Evagelia a Ioane o lo'o i ai se fa'atusa o Maria o Petania ua tusia mai se isi va'aiga. O le autū o le tala ia Ioane 11 o Lasalo, ma i se autelega, o lona tuafafine o Maretia. Ae o le matafaioi a Maria e tāua fo'i. O le asiasi so'o o Iesu i ana uō o lo'o tau fa'amatala mai. Na alofa Iesu ia Lasalo ma ona tuafafine, ae na fa'atuai lana asiasi iā i latou e ui na ta'u mai le ma'i a Lasalo. Na fa'ailoa mai le mafana o le faiga uō a Maretia ma Iesu i lona faitio ina ua taunu'u mai Iesu, "Le Ali'i e, 'ana e 'i'inei, po ua le otu lo'u tuagane" (11: 21). O le mea mātāina na alu atu Maretia e fa'afeiloa'i Iesu, ae o Maria "ua nofo i le tale" (11: 20) Ua foliga mai ua toe fa'aleo mai e Ioane le tala a Luka e uiga ia Maria sa to-

O Fafine O Le Evagelia
O Maria o Petania
Tu'utō ia Iesu
Faitau muamua - Luka 10: 38 – 42; Ioane 11: 28 – 45; 12: 1 – 8

manatu i le filemū i uiga o mea na tutupu. Ina ua mae'a sina talanoaga pu'upu'u ma Iesu, na toe fo'i atu Maretā i le fale ma fa'ailoa atu i lona uso, "Ua o'o mai le a'oa'o, ua vala'au ia te oe" (11: 28). E fa'aluā ona ta'ua e Ioane na tu vave i luga Maria (11: 29), 31). Ina ua toe fa'aleo atu e Maria upu a Maretā, na fesili Iesu po'o fea o ta'oto ai Lasalo, ma o tagata Iutaia sa fa'anoanoa fa'atasi ma Maria na tali atu, "Le Ali'i e, maliu mai ia, e te silasila" (11: 34). O upu fo'i nei na fa'aoga e Iesu i le amataga o le Evagelia a Ioane na fai iā i latou na mulimuli ia Ioane le Papatiso (1: 39). Ua toe fa'aleo mai e le fafine Samaria i le vala'auina o tagata o le 'a'ai e fa'ailoa lo latou fa'atuatua ia Iesu (1: 39). Ma ni upu e tau tutusa na vala'auina ai e Iesu Toma e fa'amausalī lona fa'atuatua i le toetū (20: 27).

Ina ua tagi Maria, na lagona fo'i le fa'anoanoa o Iesu ma tagi ai fo'i ina ua maliu lana uō o Lasalo. Tatou te manatua ai fo'i Maria Matalena lea na tagi i le tu'ugamau (Ioane 20: 11). O loimata o Maria o Petania, Iesu ma Maria o Makatala ua fa'aali mai ai le moni o le oti. Ae ua fa'ailoa mai ai fo'i o latou e talitonu, o le oti e le o le upu mulimuli lea. Ina ua vala'au atu Iesu ia Lasalo e sau i fafo, sa ia sau, leai ni saisai, ua fa'asa'olotoina mai le oti.

Ua soso'o ai le tatou fa'alogi e uiga ia Maria i le mataupu e soso'o mai ai i le Evagelia a Ioane, ono aso i luma mai o le Pasio e fa'afeagai ma le maliu o Iesu lava ia.

O aso na soso'o ai, na fealua'i ai Iesu ile va o Petania ma Ierusalem, atonu sa fa'aoga ai le fale o ana uō e to'atolu i Petania e fa'amaautu i ai a o sauniumi mo le faiga'ai. Sa tapena Lasalo ma ona tuafafine mo se "mea'ai" sa laulauina e Maretā ma Lasalo sa i le laulau ma Iesu. E masani o ali'i e 'a'ai fa'atasi, a o fafine, tamaiti, ma 'au'auna e 'a'ai 'ese. Na avatu e Maria ni suā'u taugatā ma u'u ai vae o Iesu ae solo i ona laulu, ma na manogi atoa ai le fale a o faia lea galuega. Ua sopo'ia e Maria se tuā'oi e ono fa'ate'a ai o ia. O le fa'aseā a Iuta sa tatau ona fa'atau le suā'u ma avatu le tupe mo tagata matitiva ua fetau ma le lagolagoina e Iesu o mea na faia e Maria. Na fai mai Iesu ua ia faia lea mo lona malu, ma fa'aopopo mai, "Auā toute nonofo pea ma ē matitiva, ae tatou te lē nonofo pea ma a'u" (12: 8). O le u'uina o Iesu e Maria e le o fa'auigaina o se tāga o le fa'afetai mo le toe fa'atina mai o Lasalo po'o se talimalō lelei. O lo'o tau fa'apea mai Iesu o gaoiga a Maria o se perofetaga. Ua maitauina e Maria o Iesu e pei o se ali'i fa'atoa fa'aipoipo o le a sau. Ua naunau Maria e patipatia.

E pei ona fai mai Ioane, o Iesu lava ia na mulimulita'i i fa'ata'ita'iga a Maria, ma i le po ae le'i malu, sa ia mulumulu ai vae o ona so'o-uō, e pei ona faia e Maria o Petania i lona loto 'au'auna ia te ia. Ua fa'aea ea le evagelia i lenei fafine. O Maria o Petania na iloaina "O le Atali'i o le tagata na lē sau o ia ina ia 'au'auna tagata iā te ia, ae peita'i ia 'au'auna o ia, ma foa'iina atu lona ola o le Togiola mo tagata e to'atele" (Mareko 10: 45). Ua faia Maria ma fa'ata'ita'iga o sē ua filifilia le vaega ua tatau. O se perofeta ua manatua mo ana galuega alofa ma le tu'utō lē fefe e molimau iā Iesu. O le manatua o ia ua matala uma mai ai nisi o avanoa mo so'o fafine ma ali'i a Iesu. O Maria o Petania ua vala'auina i tatau e "o mai ma va'ai" ma, talitonu ma 'au'auna, ofoina atu o tatau ola i le alofa ma le tala'ia o

le tala lelei.

Va'aiga autū – O le Laulauina o Mea'ai i Evagelia

O le tele o vasega a Iesu fa'apea lesona a o ia a'oa'o i fale o tagata. Mo se fa'ata'ita'iga, o Iesu i le amataga o lana tala'iga na ulufale atu i le fale o Peteru ma fa'amalōlō le tina o lana avā, "ona tula'i loa lea o ia, ua 'au'auna iā te i latou" (Luka 4: 39).

Ina ua vala'aulia e Iesu Levi e mulimuli atu iā te ia, fai mai Luka o le ao lafoga, "ua faia e Levi le faiga'ai tele mo Iesu i lona fale" (Luka 5: 29). Sa fai 'aiga fo'i Iesu i fale a le 'au Farasaio (14: 1), ma o i'ina sa ia tauavea ai le tulaga o lē talimalō, ma maitauina ai le taumafai o tagata ina ia maua le nofoaga maualalo (14: 7 – 11) na o'o lava i le vala'auina o le 'au matitiva, latou e pipili, latou e fa'aletonu tino, ma le 'au tauaso i le faiga'ai (14: 13). O a'oa'oga a Iesu ua liliu ai mea masani ma ofoina atu se isi faiga ua o gatasi ma tulaga e tatau ai ma le malō o le lagi. Mo Luka o tulaga mautū ma āga i le Fa'akerisiano ua fa'avae lea e lē o tulaga tau sosaiete ma faiga ua masani ai ae o le fai mea tonu e pei ona i ai le malō o le Atua. O a'oa'oga a Iesu e masani ona avatu i fale o aiga ua fa'ailoa mai ai o le fa'apotopotoga o so'o sa potopoto i fale pa'ia ua manatuaupu ma fa'ata'ita'iga a Iesu e fesoasoani ia i latou a o faimalaga i le Ala sa ia fa'ailoa ia i latou, le auala ua ia fa'asino ia i latou, ma fa'aoga uiga lelei sa ia fa'ailoa e pei o ia lava na savalia le ala aga'i atu i Ierusalem.

O le laulauina o mea'ai ua fa'ailoa mai ai o Kerisiano ana-mua sa malamalamo o le Eukalisitia o se nofoaga talafeagai e galueaina ai tulaga na afua mai fa'apotoptoga, e pei o fa'aogaina lelei o tupe ma 'oa ma le taūa o ta'ita'i fa'amaoni. Ona o ia o le talimalō i le mea'ai o le Eukalisitia, sa iloaina o le "Tausama'aga a le Ali'i", o Iesu o le pule, o ana upu ma fa'ata'ita'iga e ta'iala ai le fa'apotopotoga i le ala ole fa'aso'oina moni.

O le Atamai mai Tamā O le Ekalesia – Lauga a Sagato Aukusitino o Hippo

O 'oe Maretā, ua fa'amanuiaina ona o lau 'au'aunaga lelei, ma au galuega sa sa'ilī ai le taui mo le filemū. O lea ua e galue i le fafagaina o le tino, o se tino pa'ia. Ae a e sau i le aiga fa'alelagi, e te maua se tagata malaga e fa'aulufale, se tasi o fia 'ai e fafaga, po'o sē fia inu e avatu i ai se ipu vai, po'o latou o taua'imisa e fa'aleleia, po'o le ua maliu e mafai ona e tanuina?

Leai, e leai ni mea fa'apea. Pau le mea e te maua i'ina o mea na filifilia e Maria. O i'ina tatou te le fafagaina nisi, o tatou lava o le a fafagaina. O le mea lea o mea na filifilia e Maria i lenei olaga o le a fa'ataunu'u i lena nofoaga i ona atoaga; sa ia tufitufia fasimea'ai mai le faiga'ai, le Upu a le Atua. Pe e te fia iloaina o a mea o le a tatou maua i'ina? O le Ali'i lava ia na ta'u maia ina ua fai mai i ana 'au'auna, "Amene, ou te fai atu iā te 'oe, o le a ia fa'ata'o'oto i latou ae 'au'auna atu i ai. Sagato Aukusitino o Hippo..... O le fa'ai'uga lenei o le tala fa'asolo i fafine o le Evagelia..."

SAGATO CALLISTUA 1

POPE MA LE MALETILE (D. 223?)



O se fa'amatatalaga pito sili le fa'atuatuaaina i lenei sagato e sau mai i lona fili o Sagato Hippolytus (Aukuso 13), le ulua'i pope tete'e, ae na mulimuli ane maliu fasia mo le Ekalesia. O se matapu fa'avae leaga sa fa'aoga: A tutupu ni mea pito sili le leaga, e mautinoa lava o Hippolytus sa fa'ailoaina.

O Callistus sa avea ma pologa a le malo o Roma. Sa tu'u i ai le va'aiga o le fale tupe e lona ali'i, sa leiloa uma tupe na teuina, na sola ma na toe pu'eina mai. Ina ua mae'a ona tuli se fa'asalaga mo sina taimi i le falepuipui, sa tatalaina i tua ma sa taumafai nisi auala e toe maua mai ai le tupe. O le mea ua tupu ua so'ona fai lona ma'elega, na i'u ai ona toe saisai ma falepuipui i le fa'amisa i le sinoka Iutaia. O le taimi la lenei sa fa'asalaina e galue i se maina i Sardinia. Na tatala mai i tua ona o le malosi o le fa'atosiga a le tama'ta'i sa fa'auō ma le tupu ma na nofo i Anzio (na ta'uta'ua i le Taua lona lua a le Lalolagi).

Sa maua lona sa'olotoga, ma na avea ma lē e pulea le fanua tanu Kerisiano i Roma (o lo'o fa'aigoaina pea lava o le fanua tanu a Sagato Callistus), masalo o le ulua'i 'ele'ele na avea ma fanua a le Ekalesia. Na fa'au'uina o ia e le pope e avea ma Tiakono ma avea ma uō ma se faufautua a le pope.

Na filifilia o ia ma Pope i le maualuga o numera o palota a le ituaigasā ma tagatā lotu i Roma, Sagato Hippolytus, sa ia tu'uina atu e ia o ia lava e fa'avaeina le ulua'i pope tete'e i le tala fa'asolopito a le Ekalesia. O lenei fevaevaea'i na atoa le 18 tausaga o fai.

O Hippolytus ua fa'aeaeaina o se sagato, sa fa'aaunu'ua i le vaitau o le fa'asauaga o le 235 ma na toe fa'alelei i le Ekalesia. Na maliu o ia mai puapuagatia i Sardinia. Sa ia osofa'ia Callistus mai itū e lua – a'oa'oga ma le amio pulea. Na foliga sa fa'atele e Hippolytus le 'ese'esega i le va o le Tamā ma le Alo (toetoe lava a faia ni atu se lua) masalo ona o gagana telosia e le'i fa'aleleia. Sa ia tu'ua'ia fo'i Callistus i le tu'u avanoa, mo mafua'aga tatou te ofo ai: (1) Sa ioeina e Callistus i le Komunio ia i latou ua mae'a ona faia togisala mole fasioti tagata, latou e le fa'amaoni ia latou tautoga i le fa'aipoipoiga, ulugali'i fa'apoululi; (2) sa ia fa'atagaina fa'aipoipoiga i le va o fafine sa'oloto ma tagata pologa – ua le fetaui ai ma Tulafono a Roma; (3) sa ia fa'atagaina le fa'au'uina o ali'i sa fa'aipoipo fa'alua pe fa'atolu; (4) o lana mau o agasala moletale e le lava lea e fa'ate'a ai se epikopo; (5) sa tu'u avanoa fo'i iā i latou sa aposetata i taimi o fa'asauaga.

Na maliu fasia Callistus i taimi o le vevesi i Trastecere, Roma, ma o le pope muamua (vagana ai Peteru) na fa'amanatu o se maletile i ulua'i taimi o le fa'amautuina o le lalā fa'amaletile a le Ekalesia.

O nisi e fa'apea e ui i le lē tele o ni tala ua tatou iloa e uiga iā ia, masalo o Callistus e a'afia i le vasega faitaulia o Pope maoa'e.

LE NU'U PELEINA

4 Oketopa 2019

I le amataga o le tausaga nei sa fa'ao'o mai ai se fa'aseā ma se tagi mai se tama'ita'i talavou e fa'asaga iā Epikopo Charles Drennan.

E pei ona ta'ua i le tusitusiga a Pope Faranisisi *Vos Estis Lux Mundi*, ona o a'u o le Akiepikopo Fa'ametapolitano a Niu Sila atoa sa ou ta'ita'iina ai se su'esu'ega a le Ofisa Tulaga Fa'aave o Tomai Fa'apitoa (NOPS) e uiga i lenei tagi. Sa alu ai se taimi. Sa tu'uina atu fo'i i ai ma ni fa'amafanafanaga ma ni lagolagosua mo Epikopo Charles ma lenei tama'ta'i, ma o la'ua uma sa 'au ai i lenei su'esu'ega.

Ona o se fa'ai'uga o le komiti sa gafa ma lenei su'esu'ega, ua talia ai e Pope Faranisisi le fa'amavaega a Epikopo Charles o le Epikopo a Palmerston North, na amata ananafi ona fa'amuta ai lea tofi tau'ave.

O lenei tama'ita'i talavou e lē mana'o e fa'ailoaina o ia i nusipepa, e lē mana'o fo'i e fa'amatala 'auiliili pe fa'asoa ma le laua'itele. Ou te talosaga atu ai iā outou ina ia fa'aaloalogia lana talosaga.

Ua tofia a'u e le Tamā Pa'ia e tau'avea le tofi Fa'atonu Fa'aaposetolo a le Pule'aga a Palmerston North se'ia

LE NU'U PELEINA

tofia se epikopo mo lea pule'aga. A o ave ni aso malolo a Epikopo Charles sa tau'ave e Epikopo Peter Cullinan nisi o tiute tau'ave a epikopo Charles. O Patele Brian Walsh, o le Sui – Epikopo, o le a a'afia i le va'aiga o nisi o tiute a le Pule'aga fa'atasi ai ma Tony Murphy, o le Pule – Fa'apule'aga, e fa'aauauina ma ta'ita'ia galuega fa'aofisa ma le va'aiga fa'alafalemū o le Pule'aga e pei ona latou faia mo ni nai masina.

Ou te talosagaina ai a outou talosaga mo tagata ma faife'au a le Pule'aga a Palmerston North, ma latou uma ua afaina i lenei tulaga faigatā, aemaise lava le tama'ta'i ua afaina.

O fa'asinoala mole tali i su'esu'ega o le a afua mai ai le tu'u fesili mai tagata laua'itele o lo'o tu'uina atu fa'atasi ma lenei tusi. O fa'amatalaga pe fa'apefea ona tali atu i se isi e faia se tagi iā oe ona o ni amioga lē tau-pulea mani a'afiaga fa'aletino. Tatou te fa'anaunau ina ia fa'ama'oti lelei ni tu ma ni aganu'u e puipuia ai le saogalemū e mafai ai e tagata ona aumai ni fa'aseā e uiga i mataupu fa'apenei.

O le fa'amatalaga atoa mai niusipepa o lo'o avatu mo lo outou silafia. E talia ni fesili e tu'u sa'o i le NZCBC le Faufautua ma David McLoughlin communication@nzbc.org.nz

O manatu ma tatalo i'inei i Roma mo outou i le Pule'aga Fa'aakiepikopo, ona o le tele o feso'ota'iga i le va o Palmerston North ma Ueligitone ma ou te iloaina le to'atele o outou o le a a'afia ai i lenei mataupu.

I lana asiasiga i Chile ma Peru i le amataga o lenei tausaga na saunoa ai Pope Faranisisi i upu nei ua tatou to-manatunatu fa'atasi ai:

“O le agaga o le nu'u ua fuaina pe fa'apefea ona ia taumafai e o mai fa'atasi e feagai atu i taimi o faigatā ma vevesi, ina ia fa'aolaola ai pea le fa'amoemoe. I le faia fa'apea, ua latou tu'uina atua ai se molimau sili i le Evagelia. Ua fai mai le Ali'i iā i tatou: *'O le mea lea e iloa ai e tagata uma lava o o'u so'o outou pe afai ua outou fealofani'* (Ioane 13: 35)”

O Tatalo ma Fa'amanuiaga

Katinale John Dew

Akiepikopo a Ueligitone

UA FA'AMAVAE EPIKOPO CHARLES DRENNAN O PALMERSTON NORTH

Aso 4 Oketopa 2019

Fa'aliliuina Falefou Sio

O Katinale John Dew, o le Akiepikopo Metapolitano o Niu Sila, i le asō ua fa'asalalau mai ai le fa'amavaega a Epikopo Charles Drennan, o le Epikopo a Palmerston North. Na tu'uina atu e Epikopo Drennan lana fa'amaavaega iā Pope Falanisisi i le ma'ea ai o se suesuega i se faitiōga i amioga lē talafeagai o se natura feusua'i. O le fa'aseā sa faia e se tamaita'i talavou. Ua talia e Pope Falanisisi le fa'amavaega.

I lalo o lenei faitiōga, o le vaega o le Ofisa Tutoatasi o Su'esu'ega a le Ekalesia i Niu Sila, le Ofisa o Tulaga Fa'avae o Tomai Fa'apitoa a le mālō (NOPS), i se konekarate tutoatasi, o tagata su'esu'e laiseneina e faia se su'esu'ega i lalo o le va'ava'aiga a Katinale John Dew. Ua fa'ase'e ese Epikopo Drennan mai ona tiute. Na auai uma Epikopo Drennan ma le tamaitai talavou i lenei su'esu'ega tutoatasi.

Sa logoina le tamaitai talavou e uiga i lana fa'amavaega ma o le a feso'otai pea ma le Ekalesia. Ua tu'uina atu e le Ekalesia le lagolago faifai pea i lenei tamaitai talavou, o lona aiga ma i latou o lo'o si'omia o ia.

"Na talosagaina e le tamaitai talavou ia auiliiliga o lana faitiōga ia 'aua le fa'alaua'iteleina," pei ona saunoa ai Katinale Dew. "Ua fa'amaonia le taliaina e Pope Falanisisi o le fa'amavaega. I luma o le Ekalesia Katoliko, o le amioga a Epikopo Drennan e matuā lē taliaina lava, ma e lagolagoina atoatoa ai le tamaitai talavou i le o'o

UA FA'AMAVAE EPIKOPO CHARLES DRENNAN O PALMERSTON NORTH

mai i luma i le NOPS (National Office of Professional Standards)," o le saunoaga lea a Katinale Dew. O faifeau, le aufaigaluega ma ta'ita'i fa'ale-eklesia o le Puleaga a Palmerston North ua uma ona logoina e uiga i le taliaina o le fa'amavaega a Epikopo Drennan ma tu'uina atu ai ta'iala ma punaoa e fesoasoani ai i tagatālotu ma isi itutino o le faiganu'u Katoliko. I le aotelega o le Eklesia i Niu Sila o le a fautuaina ma lagolagoina.

"E lē `alo le Eklesia Katoliko i so'o se amioga lē talafeagai a sona sui. Ou te fa'amalosi'au i so'o se tasi na faia i ai so'o se ituiga o amioga fa'apea e aumai i luma o le Eklesia, i leoleo po'o so'o se fa'alapotopotoga latou te lagona e to'afilemu ai," pei ona saunoa Katinale Dew.

Feso'otaiga mo Fa'asalalauga:

Katinale John Dew
c/o David McLoughlin,
Communications Advisor New Zealand Catholic Bishops Conference
Imeli: communications@nzcbc.org.nz
Telefoni: 021 611 052

O lana Afioga Katinale Ioane Atcherley Dew DD o se Epikopo Katoliko Roma. Na tofia o ia e avea ma Akiepikopo o Ueligitone i le 2005 ma si'itia ai i tofiga Katinale i le 2015. O ia foi o le Sui Peresetene o le Koneferenisi a Epikopo Katoliko o Niu Sila.

O le Akiepikopo Metapilitano o Niu Sila o le epikopo sinia i se vaega o puleaga uma o se atunu po'o se itumalo. E fa'atapula'a ana galuega tauave ma lana pule i le va ma isi puleaga ma e leai sona malosi patino e puleaina ai se puleaga o lona itumalo. I le masina o Me 2019, na tu'uina atu ai e Pope Falanisisi i Akiepikopo Metapolitano le pule e va'ava'aia ai su'esu'ega e uiga i faitiōga o feusuā'iga fa'asaga i epikopo o puleaga i itumalo Fa'a-Akiepikopo.

O le Puleaga Katoliko a Palmerston North o le itulagi o Niu Sila e paitino i le Epikopo o Palmerston North. O le itulagi e fa'asolo atu i le itu i matu o Taranaki i sasa'e e o'o atu i sisifo o Hawke's Bay, fa'asolo atu ai i le talafatai ma vaega tutotonu o Whanganui-Waimarino ma Tararua i Manawatū ma nisi vaega o Wairarapa.

O le Ofisa mo Tulaga o Tomai Fa'apitoa a le malo (NOPS) e fa'atulagaina le manulauti ma fa'amautinoaina faitiōga i le usitaia o polisi ma aiaiga a le Eklesia Katoliko mo le fanau ma tagata matutua e fa'amanu'alia. Latou te gafa foi ma le va'ava'aiga o su'esu'ega o faitiōga o feusuā'iga fa'amalosi ma amioga fa'afeusua'i lē taupulea e fa'asaga i faise'au ma i latou e i lalo o vaega fa'ale-ituaiga.

Afai o 'oe po'o se tasi e te silafia e i ai se faitiōga:

O lo'o i ai se vaega fa'apitoa a le Eklesia e fa'ataunu'u i ai faitiōga e fa'asaga i amioga lē talafeagai i so'o se fa'alapotopotoga a le Eklesia, e lagolagoina ai e ua tagi ina ia maua le ala moni e fa'amaloloina ai, ma su'esu'eina ai faitiōga e fa'aaoga ai se faiga ua fa'avaeina pe a mae'a fa'agasologa fa'ale-malo po'o fa'agasologa foi e le'i fa'ataunu'uina. O le National Office for Professional Standards (NOPS) e mafai ona fa'afeso'ota'i i le 0800 114 622 po'o le initaneti o le: safeguarding.catholic.org.nz.

TAIALA 2019 (GUIDELINES)

Fa' aliliuina e Lauano A. ILAOA

Ua matou tapenaina ta'iala nei i lalo e lagolago ai le Itua'igasā ma ta'ita'i ole Ekalesia ile taimi e tali atu ai i ni fa'afesili e uiga i lenei mataupu:

Fa'ailoaina atu i palisi ma tagata Katoliko

Matou te fautuaina malosi lava le fa'ailoa atu o le fa'amavaega a Epiekopo Drennan i tagata o le tou palisi ma tagata Katoliko uma, e auala ile faitauina ole fa'asilasilaga fa'alaua'itele ile taimi ole misasa ole fa'aiuga ole vaiaso nei, ma fai talosaga e lagolago ai i latou ua a'afia. E taua le tatou talanoaina o lenei mataupu i se tulaga fa'alaua'itele e faia ma le fa'aaloalo.

O se vaega taua olo tatou fa'atuatua, ole tatou talitonuga ile tamali'i'aga ole tagata, ile taimi e talanoaina ai lenei mataupu, ma e fa'amolemole manatua le tamali'i'aga o tagata ma vaega uma o lo'o a'afia. Afai e fesiligia oe e nisi, ia fa'afogofa ma le to'a, ma tu'uina atu iai lau lagolagosua. Ia feso'ota'i atu foi i le faifeau pule poo le epikopo, pe afai e te lagona e te mana'omia se lagolagosua.

Fa'afesili mo ni fa'asea:

Afai e talanoa ane se tagata ia te oe e uiga i se fa'aseā e fa'asaga i se tasi o le Ituaigasā, po'o se tasi ole palisi ma le Ekalesia:

Fa'alogo lelei iai ma le fa'aaloalo ma fautuaina lea tagata ina ia faia sana lipoti e tuuina atu ile Ofisa Tulaga Fa'avae o Tomai Fa'apitoa (NOPS) poo Leoleo (e maua isi auili'iliga i lalo)

Ole NOPS o se komiti fa'apitoa a le ekalesia e lagolagosua i tagata e faia ni fa'asea e tusa o ni sauaga ma ni manu'aga e aliali mai totonu ole Ekalesia, ma latou te su'esu'eina mataupu e a'afia ai uiga le taupulea ma uiga saua e ono aliali mai. Ole Telefoni a latou ia: 0800 114 622. Website: safeguarding.catholic.org.nz

O le Ofisa o Leoleo e latou te lomia i luga o le latou upega o fesooota'iga ia fautuaga mo tagata e afaina i ni soligatulafono: www.police.govt.nz/advice/victims

O tagata sa a'afia i ni sauaga mataga, e mafai ona o latou feso'ota'i atu ile Komisi Su'esu'e o loo feagai ma le iloiloina o Faiga Saua Mataga na a'afia ai tagata sa i lalo o le va'aiga ma le tausiga a le Malo, aemaise ole tausiga a Faalapotopotoga fa'alelotu. O le latou upega o feso'ota'iga e fesoootai iai ole: www.abuseinstatecare.royalcommission.govt.nz.

Ia fautua ia i latou ia e mafai ona fesooota'i i soo se Epikopo poo se fa'alapotopotoga a le ekalesia e talanoaina ai a latou mataupu, faia ni fa'asea aloa'ia, ma fetufaa'i i o latou mafatiaga.

Lipoti e oe ile NOPS le mataupu

Fautuaina i latou e tele isi fa'alapotopotoga e maua ai le fesoasoani mo latou.

Fa'afesili mai le au faasalalau:

O Katinali John Dew o le Fofoga Aloa'ia lea ole ekalesia ile vafeagai ai ma le au fa'asalalau e tusa o le mataupu lenei, i lona tulaga o ia ole Akiepikopo o Niu Sila. E ui ina o loo iai nei o ia i Roma, ae ole a maua lava le avanoa e talanoa ai o ia ma le au faasalalau e fuafua i ona avanoa.

Matou te malamalamalama lelei ma le agaga fa'aaloalo le ono to'atele o tagata e fia manino ma malamalamalama atili i lenei mataupu. Afai e ono fesooota'i ane ia te oe se sui o le au faasalalau, e matou te fautuaina oe ina ia tali lelei iai i se tulaga manino ma le malamalamalama ma ia fa'apu'upu'u. O nai fa'amatalaga ia ua tusia i lalo e ono fesoasoani atu ia te oe.

O lea ua ou iloa o le fa'amavaega a Epikopo Drennan e mafua ona o se fa'aseā ua faia fa'asaga ia te ia e se tama'ita'i talavou, e tusa o ni amioaga le talafeagai.

O le suesuega aloa'ia sa faia e uiga i lea fa'asea, sa feagai lea ma le Ofisa Tulaga Fa'avae o Tomai Fa'apitoa a le ekalesia (NOPS).

E tapu ma e le faatagaina se tasi e amio le talafeagai i totonu ole ekalesia.

TAIALA 2019

E le talafeagai ia te a'u ona ou talanoaina pe fa'aalia se manatu auiliili e tusa o lenei mataupu, ae tau ina ou fa'apea atu, e taumafai le ekalesia ina ia maua se siosiomaga saogalemu ma malu puipua mo tagata uma.

O nisi fesili e ona tuuina atu e le mafai ona taliina e latou e faia iai, atoa ai foi ma nisi e le fia talanoa i tagata faasalalau, e mafai ona tali fa'apea iai:

(E pei ona ou taua muamua) ole a le talafeagai ona ou talanoa pe fa'aalia se manatua auiliili i lenei mataupu. Afai e te mana'o e saga talanoa pea i lenei mataupu, ona malie lea, fa'afeso'otai Katinali John Dew e auala atu ile Faufautua tau Feso'ota'iga a le Fono a epikopo o Niu Sila o David McLoughlin, i le imeli:communications@nzbc.org.nz, poo le Telefoni 021 611 052.

TA'ITA'IGA A LE TAGATA AUAUNA POO LE TAGATA TAUTUA

Faaliliuina Falanisisi Anamani

O loo tatou vaaia pea le auai o le faifeau poo le pelepitelo i le tofiaina o ni tagata e fesoasoani, e faafo'ia fe'eseesea'iga ma faia faai'uga tetele, ua faapea foi ona ia filifilia nisi e faaleleiia nisi o faafitauli ma faalototeli i latou i le faalelei atili ma galuea'ina tulaga i le tāua o le 'auai i le ta'ita'iga ma fesooota'iga e ala i talanoaga. E faasolosolo mai o nisi tagata o le palisi latou te umia nisi o tofiga ta'ita'i ma ua talafeagai i le ta'ita'i ina o nisi o vaega ma latou faia nisi o faai'uga. Ua faapea ona ta'ua e Wilson, o iinei i le vaega lea o le a amata ona lagona ai le tau faavaivai ma le lē fiafia e faasoa atoatoa le ta'ita'iga. O se taimi tonu fo'i lea i le olaga o le palisi e ao ina fai ai ni a'oga atoa ma ni toe faamanatu, o le taulogologo i olaga o tagata ua matutua. O tagata matutua o loo auauna i totonu o le palisi e ao ina toe a'oa'o ma faamalosi'au i ai ina ia tupu atili lo latou malamalama i le Faavae, o le ola lea i lo latou faatuatua.

Ma leisi, o le pelepitelo ua auai faatasi ma tagata. O loo ia silafia o ia o loo iai faatasi i totonu ma tagata ae le na o luma o le palisi. O ta'ita'iga ua tufaina atu i le lautele ma le auai i vaega tāua o le olaga o le palisi ua faatautaia lea e tagata galulue mai pālisi. O faai'uga sa faamalosia lea i le auai i mea e fai ae le o le faalagolago i agavaa, e faamalosi'au foi i ni tomai fou e mafai ona fetuutuuna'i ma maualuga lona amana'iaina. E iai nisi taimi e to'esea ai le faifeau pe mo ni nai vайасо, se'i vagana ai le Kofesio ma le Eukalisitia, ae o isi vaega e faataunu lava e pei ona masani ai.

I le isi itu, e mafai i le faifeau ona tuu galuega fai a le palisi i isi ae matuā faaaogā lona taimi i galuega faaleoleo mamoe ma galuega faa-Sakalāmeta. Ua atagia mai ua i fafo la'ititi ma faai'uga fai a le palisi ae peita'i o se faufautua o i le itu faaleagaga.

E i ai faigatā e fesooota'i ai i le faiga lenei faatatau i ta'ita'iga. O faatalatalanoaga ma le galulue faatasi e tuai ma e le mautū. E i ai sona popolega o nisi tagata e i'u ina latou tulituliloaina o latou lava taofi ma manatu. E mana'omia ai foi se faanaunauga mo tagata aulotu ina ia fesooota'i pea i taimi pei ona masani mai ai, ma fesoasoani auā faai'uga o loo faamatuuiua mai i a'oa'oga a le Ekalesia mo le lautele o tagata, ae le faapea o ni mea e patino i le faitalia o tagata ta'ito'atasi.

E tatau ona manatua o ta'ita'iga uma e faapogai mai ona o se mafuaaga faapitoa. E tele lava ina amata mai tonu i se si'osi'o-maga o loo iai. O se faifeau fou a le palisi e tatau ona fai ana faai'uga i tulaga aga'i i luma o le palisi muamua a'o le'i tuuina atu tofiga ta'ita'i i le lautele. E ao fo'i ia te ia i le taimi lava lea e tasi, ona amata taualumaga o le tapu'eina o le iloa ma le malamalama atoa ma vaega e gafatia e tagata palisi pe ua alagātatau nei tulaga. E ao ia te ia ona faaaogāina pea taleni o loo i ai i le taimi nei, ina ia fesoasoani a'o loo faagaluea'ina nisi o taleni fou mo le sologa lelei o le palisi mo le lumana'i.

Tuu faatasi

E ui ina tuuina atu i le lautele tofi o le ta'ita'iga, ae o le matāfaioi lava ia e patino tonu i le faifeau, e tusa ma le tulafono sili a le Ekalesia, o le faifeau lava e pa'ū i ai le aga'i i luma o le palisi poo le faapotopotoga o loo ia auauna ai. E faapefea la ona ia mautinoa o loo ola ma sologa lelei le palisi, ae o le tele o vaega e le o auai? O la'u tali i ai, o le i ai lea o se ata faataatia e mautinoa e galulue i ai tagata uma ta'ito'atasi. E mafai ona tuu i ai se lisi o vaega tāua e ta'u atu ai le faatinoga o ia vaega. O se ata faata'ita'i, afai o se a'oga e mafai ona ou amata i se lisi o vaega tāua, e mafai ona ou fai i a'u faia'oga e faalautele ma toe fetuutuuna'i. E maua loa se lisi ua malamalama i ai, ona amata loa lea ona tuu faatasi ma teuteu se'i oo lava ina totoe mai na o vaega tāua e sefulu. O vaega la nei matou te faatalatalanoaina faatasi ma le lautele, toe teuteu atili ma faai'ua loa ma autasi e talia o le 'auivi lenei o le matou galuega.

A faapea o se palisi, lona uiga e ese sona faatinoga. E taatele i totonu o palisi ona fai ai se ituaiga o Ta'iala a le Palisi e aofia ai ma ni sini autu. O vaega nei e taula'i i ai taualumaga a le palisi mo le lumana'i. O fuafuaga mo nei ta'iala ua matuā tāua mo lona taunuuga. E tatau i tagata palisi ona talanoaina vaega nei, ma fetufaa'i manatu e uiga i le sini poo le manatu autu o loo fia ausia. O le a avea lenei ma 'auivi o le galuega e mafai e tagata ona galulue manino ma malamalama i ai i vaega esesee, o latou matāfai-

TA'ITA'IGA A LE TAGATA AUAUNA POO LE TAGATA TAUTUA

oi o ni ta'ita'i. O le a fono ma feiloa'i le faifeau palisi faatasi ma i latou o i ai ni tofiga iloga, ina ia faamaontoa o loo faamaoni pea i latou i le galuega ua tofia i ai i latou ma galulue ai. O le tulaga lenei e ao ina puipui i ai le palisi, ina ia alo ese mai i le taula'i o le vaai i le sini ma le ola feavaeaea'i.

Tumau i le faatuatua

I lenei matāpu atoa, o le faamaoni ma le faaaloalugia o le faifeau e sili lea ona mauāluga. E pei ona ou ta'ua muamua, o lo'u manatu o le to'atele o tagata Katoliko e ao ina latou talitonuina le latou faifeau. O le malamalamā ma le manino, e faa-le-atoatoa i le Ekalesia Katoliko, ae o se mea e ao ina maua ina ia taofimau i lenā manatu, i le talitonuina lea o le faifeau. O talanoaga mo le aumaia i totonu faatasi o nisi tagata, o se matāpu e fetuuna'i i ai nisi o taofi i le talitonuina. Afai e le talitonu tagata palisi i le latou faifeau, o le a faapea foi ona latou le mulimuli atoatoa ia te ia, o le a la le ituiga ta'ita'i pe afai e leai nisi e mulimuli i ai? O le tasi vaega e ao ina ave ese, o le faaosoosoga, ina ia faasagatau atu i le pule a se tasi o loo umia se tofi ta'ita'i, e tali atu ai i se fanoga na auala mai i se tagi a se tasi tagata o le palisi. E tatau ona manatu ma tali atu i ai, ae ia manatua, ia taofimau pea i le faamaoni o le ta'ita'iga. Afai e manatu tagata e mafai ona latou 'alo'alo iā i latou i tofiga ta'ita'i, latou te faia lava, ma o le a latou fesiligia faavae.

Lu'itau ma le Taui

O le ta'ita'iga a le tagata auauna poo le tagata tautua o loo folasiaina mai iinei, na te mana'omia ai le tatalo, le loto onosa'i atoa ma le va fealoaloa'i ma isi. E ui i faigatā o loo lu'itauina ai le ta'ita'iga, ae peita'i ane, e telē atu ma anoanoa'i lona faamanuiaina.

Papatiso ma Auina Atu: O le Ekalesia a Keriso i lana Misiona i le Lalolagi

O le sini autū na filifilia e Pope Faranisisi mo le Masina Uiga'ese mo Misionare ua fa'amamafa mai ai o le auina atu i se misiona po'o le galuega tala'i o se vala'au e sau mai le papatisoga ma e mo latou uma ua papatisoina. O le misiona la o lona uiga o le auina atu mo le fa'aolataga ua aumaia le fa'aliliuga, e le gata o lē na tatalia le fe'au ae fa'apea lē na auina atu: "Ia Keriso, o tatou olaga o se misiona! O tatou o misiona ona o tatou o le alofa o le Atua ua sasa'a atu, o le pa'iaga o le Atua ua foafoaina i lona lava fa'atusa. Misiona la, o lo tatou lava tuputupu a'e i le pa'iaga ma o le lalolagi atoa, amata mai le foafoaga" O le alafua la o le fa'amisionare o tatou papatisoga ua avea ma molimau o le pa'iaga ua fa'ameaalofaina le ola ma le matagofie i lo tatou lalolagi.

O le fa'atauanau a le Tamā Pa'ia mai lona nofoa i le misiona – o se fa'atauanau ua fa'aali e ala i lana fa'aaliga fa'alafu mamoe i le Ekalesia o se tasi e "malaga ma le lē fefe", o se "falema'i i malae" ma "tagata pa'ia o le Atua" – ua lauiloa nei.

O le *Evangelii Gaudium* ua fa'amausalīina lenā misiona e tatau ona avea ma fa'ata'ita'iga ma galuega i aso uma a le Ekalesia. E mana'omia se fa'aliliuga fa'amisionare moni o so'o a Iesu ma se fa'avae o fa'apotopoto-ga fa'aekalesia o se tulaga mautū o le va feagai ai fa'amisionare ma Keriso, se feiloa'iga mafana ma Iesu soifua i lana Ekalesia.

O nisi o taimi e mou atu o tatou fiafiaga mo le misiona ona e galo iā i tatou o le Evagelia e tali i o tatou mana'oga loloto, talu mai le foafoaga o tatou ma mea ua ofoina mai e le Evagelia: fa'auō ma Iesu ma le alofa mo o tatou uso ma tuafafine. A mafai ona tatou fa'amatala manino lelei ma le matagofie vaega tauā o le Evagelia, e mautinoa o le a talanoa mai ma le fa'anaunau tele i le loloto o loto o tagata: "O le fa'amisionare ua mautinoa e ala i galuega a le Agaga, ua i ai i tagata ta'itasi ma tagata se fa'atalitali, e o'o lava iā i latou e le o manatu i ai, le iloaina o le moni e uiga i le Atua, e uiga i le tagata, ma pe fa'apeflea ona fa'asa'olotoina i tatou mai le agasala ma le oti. O le fa'anaunau a misionare e folafola le Keriso ua sau mai le mautinoa o lo'o tali mai i lenā fa'anaunauga.

A fuafua i lenei mana'oga fa'avavevave mo le toe fafaguina o misionare, o le fa'ai'uga a le Tamā Pa'ia – fa'ailoa aloa'ia mai ia Oketopa aso 22 2017, Aso Sa Misiona – ma vala'auina Oketopa 2019 e fa'ailoga ai o se Masina Uiga'ese mo Misionare e le fa'ate'ia. O le fa'amanatuina o le selau tausaga o le tusi fa'aposetolo a Pope Penitito XVI *Maximum Illud* o se avanoa lelei lea e talosaga ai i le Ekalesia atoa e fa'afou o ia lava ma avea ma fa'aliliuga atoa iā Keriso, ma fa'aevageliaina le fa'afouina o lana misiona. O se avanoa fo'i e patipatia ai faiga tatalo lelei, tomanatuga, fa'avaeina, ma galuega lelei fa'amisionare o le a fa'ailoa ai le naunauta'iga i le fua o le ola ma le fa'atuatua o kerisiano. O le Masina Uiga'ese Fa'amisionare ua aumaia ai se avanoa mata-gofie e fa'afou ai a tatou 'au'aunaga fa'aevagelia i le galuega tala'i a le Ekalesia.

I SAKALAMETA UA TATOUFETAIA'I AI MA KERISO LE FA'AOLA

O LE MISASA MA LE GALUEGA TALA'I

I le tusitusiga o le *Sacramentum Caritatis*, na fa'amatala ai e Pope Penetito XVI le ute o le va fetaia'i o le Misasa ma le galuega tala'i e ala i le fa'aupuga ***Ite, missa est.*** O lenei auina atu ua fa'ai'u ai Misasa, e i ai lona fa'auigaina loloto e fa'auiga i le misiona a Kerisiano. I le fetaia'i ma Keriso i le upu ma sakalameta, ua auina atu i tatou e avatu ma molimauina i lona afio ai i le lalolagi.

Ua fa'aleo mai ai le auina atu e Iesu o ana Apostetolo i 'a'ai ma nu'u i autafa ina ua mae'a se taimi sa latou mafuta ai. Sa talafeagai lava fo'i ma fa'atonuga a Iesu i ana Apostetolo e fa'atalitali i Ierusalem se'ia uma ona papatisoina i latou e le Agaga Pa'ia i le Penetekoso. A aunoa ma Keriso ma i latou e ala i le Agaga, e leai se upu po'o ni gaioiga a le 'au Apostetolo e avea ma molimau moni a Kerisiano. O le Fa'akerisiano e lē na o se fe'au i upu, o le folafolaga o le Upu Avea ma Tino o lo'o nofo i totonu o i tatou. E lē mafai ona tatou molimauina le afio ai vaganā ua tatou ola iā te ia ma ia iā i tatou. O le fetaia'i e muamua atu i le misiona; o lona uiga o le misiona a le Alefa ma le Omeka.

E aunoa ma feiloa'iga fa'asakalameta ma Keriso, o la tatou misiona e noa. Ma o le ***Ite, missa est*** ua fai mai a lē i ai le misiona, e lē atoatoa le Misasa. O Sakalameta e le oni mea e le gaioi. Latou te momoliina le afio ai o Keriso, ma o lo'o tauaveina fo'i lona fa'anaunau e o atu i nu'u uma ma lavea'i le lalolagi.

MISASA FA'AI'U A LE AUTALAVOU

13



O LE EKALESIA MA LANA GALUEGA TALA'I

Ua amata i lenei masina ona lomia fa'asolosolo atu mo le silafia o le mamalu ole au faitau, ia fa'aliliuga nei o nisi o tusitusiga i le Gagana Peretania, mai se tasi o nusipepa iloga a le Ekalesia.Ua fa'aulutalaina lenei tusitusiga, ole, *Ekalesia ma lana Galuega Tala'i* (The Church on Mission). Ole fa'amoemoe maualuga ia iai sona aogā i lo outou soifua ma lo matou ola tautua ma auauna ile Atua ma lana galuega i lenei lalolagi.

..saunia e Lauano ILAOA

(Vaega Muamua)

O le fa'aupuga a Sagato Luka lea na ia ta'ua ai e fa'apea, “*Ina ua latalata ile taimi e aveina a'e ai o Ia ile Lagi*”, e le gata e fa'atatau ile afio a'e o Iesu ile Lagi, ae e fa'atatau foi i le misitelio o ona puapuaga ma lona maliu i Ierusalema.

Sa finagalo Iesu ina ia muamua ona a'afia i lana galuega tala'i le Au Apostolo e to'a Sefulumalelua, ona soso'o ai lea ma le Ekalesia, lea sa ia fa'avaeina i se vala'au fa'apitoa.Sa le aunoa ona mulimuli ia te Ia lona au so'o, e ui ina sa faigata ona o latou malamalama ile uiga o lana galuega, e pei ona tatou molimauna ia latou lava ‘upu ma galuega fa'atino: e foliga o se malaga ole fa'aliliuga, lea e amata i se vala'au ma fa'aauau ai lava ile olaga atoa ole tagata.

O le uia e Iesu o vaifanua o Samaria ile taimi o lana malaga aga'i atu i Ierusalema, o se mea taua tele, aua ua e pei o se fa'ailogia e manatua ai le fa'aliliuina ole au so'o, o se la'asaga e tau'ave ma fa'aaauauina pea, ina ia mafai ai ona latou fa'atasi ma Ia ma fesoasoani ia te Ia....O le tali a Iakopo ma Ioane ina ua fetaia'i le Alii ma uiga le manuia o tagata Samaria ole nu'u, o se tali na faia ile ita ma le fa'atupu vevesi.... “Le Alii e, e te finagalo ma te vala'au i se afi mai le Lagi e fa'aumatia ai i latou?”. O le finagalo o Iesu, o se talosaga le talafeagai tele lea, ma sa fa'apena ona Ia fa'ailoa atu lea tulaga i ona soo ia e to'alua, “Lua te le iloa le ituaiga o Agaga e iai oulua, auā ole Atalii ole Tagata, e le'i sau e fa'a-fano se tasi, ae ia fa'aolaina.”

O le galuega tala'i a le Ekalesia ole taumafai lea ina ia foliga ile tagata ma le misitelio ole Keriso. O se fa'aliliuga, e mana'omia ai le olaga atoa ole tagata, ae feagai le Alii ma le matafaioi ole talaia o faitoto'a mo le galuega tala'i ma le uuna'ia ai o loto ma agaga o tagata.O le taimi ma auala e fa'aliliuina ai nuu ma atunu, ole galuega lea a le Alii: o le tiute ole Ekalesia, ole fa'aliliuina lea o ia ile Agaga ma le tagata ole Alii o Iesu Keriso.

O fa'amaumauga ile Evagelia e sulugia ai ile malamalama le loloto ole galuega ole fa'aliliuga lea e mana'omia i totonu ole Ekalesia, ina ia mafai ai ona tauave ma faatino lana ia lava galuega tala'i.E mafai ona fa'aleagaina le galuega tala'i lea, mai totonu lava ole auso'o o Iesu, e auala i faaosoosoga ma le manatu fa'apito atoa ma le malosi ma le pule. Ole fa'aleagaina ole galuega tala'i a le tagata lava ia ona ole agasala, na faia ai e le Alii o Iesu se fa'atusa ma ia saunoa ai i lana a'oa'oga fa'afa'ataoto: mo tagata ina ia avea fa'apei o tamaiti.O soo se tasi e iai le lagona ua vala'auina o ia ile galuega tala'i, e na te mana'omia se fa'aliliuga ato'ato'a: ina ia avea fa'apei o se tamaitiiti. O le apostolo tala'i, e tatau ona ia te ia le fa'atuatua e pei o le fa'atuatua atoatoa o tamaiti i o latou matua, ma lo latou mautinoa ole alofa o latou matua ma le latou puipuiga.

O le tulaga lea e tasi e iai le Alii o Iesu, o ia ole Atalii o lona Tama, e manino mamalamalama lelei i

O LE EKALESIA MA LANA GALUEGA TALA'I

le mea moni, e mautinoa ma naunau e usita'i ma faia le finagalo o lona tama. Ole foai atu o tagata ato'atoa ia Iesu, ona pau lea ole auala, e mafai ai e tatou ua taua o apostolo ma soo o Iesu, ona fa'atino le galuega tala'i ua vala'auina ai i tatou. O le Kerisiano ua moni lona avea fa'apei o se tamaitiiti, o le a ia iloa e auala i galuega faatino, o le manuia o lana galuega tala'i ua iai lea i a'ao o Lē na ia fa'atuina Keriso mai le oti ma o Lē na auina mai ia.

O se atalii po o se afafine ile Atalii, o so'o uma i latou ta'ito'atasi ma o se misionale, aua o latou e auina atu e alagaina ma fa'aiola atu le talalelei, e lagolagoina ma o fa'atasi ma le au agelu, o ni ave fea'u mamana e mausali i o latou loto ma mafaufa le fe'au, e fai lea ma fa'avae ole galuega tala'i ile fetaiai ai ma lu'itau ole lalolagi ua latou ofo e molimau iai. E pei o le au agelu tausi ua totofi iai tatou taitoatas, o se so'o tamaitiiti e le aunoa ona ia va'aia i foliga o le Alii o Iesu ia foliga ole Tama, ma e le aunoa foi ona ia iloa i foliga o se uso, le iai o se tuafafine, e mana'omia le alofa ma le fa'asaoina.

O le tuuina atu ole fa'atuatua ile au so'o latou te tauaveina ai le galuega tala'i e auala ile fa'aiola atu ma le alagaina ole Malo ole Atua, o se tulaga o loo pulunaunau ma finagalo Iesu ina ia ave iai le fa'amuamua ile galuega. Latou te aumaia le feau ole filemu, e auga ile oo mai ole "Malo ole Atua": ole fa'a-afio mai ole Alii o Iesu, i lana malaga. E pei ona iai ile lalolagi Palesetina, ole a fa'apena foi i soo se vaega ole lalolagi i soo se taimi. E oo i poloa'iga a Iesu i le mea e tatau ile au apostolo ona fai pe a te'ena ma le tausia i latou e tagata ile taimi o latou tala'iga ole Malo ole Atua, e lima ta'ita'ina lava ma fa'atonutonuina, ile taua ole galuega tala'i.

Ole saunoaga manino a le Alii o Iesu i ona so'o tala'i, afaei te'ena ma lē talia i latou, ona ole tala'iga ole Malo ole Atua, ina ia aua le popole pe manatu mamafa iai, aua ole matafaioi lea a le Alii. E oo lava ia le te'ena ma le sauaina o le Alii o Iesu, e mafai ona avea ma avanoa lelei, ona o Iesu, e mo le au so'o e liliu atoatoa ai ma le fa'atuatua ile Pasefika ale Matai Sili, lea e alagaina ai lona Malo, lona taunuuga ole avea o ia ma Mesia ma le Faaola, ma ia faatinoina ai le finagalo ole Tamā mo le fa'aolataga ole lalolagi.

O le fa'ai'uga e a'afia ai le fa'aolataga o a'ai ole a aofia ile Paseka o Iesu Keriso, fa'apea le Malo ole Atua, e auala ile tagata ole Atalii, ole matafaioi patino lea a le Atua. E leai se tagata e mafai ona ia iloaina le manuia poo le malaia (Mt 13.24-43): o le au so'o tala'i e tatau ona musaesae ai le alofa mo le lalolagi, ina ia mafai ona faasaoina tagata uma, e o foi i latou e su'e mai alii ma tamaitai mai augatupulaga 'uma, i soo se nu'u ma a'ai, ina ia leai se tasi e misia le alagaina ole Talalelei ole fa'aolataga.

(Fa'aauau ile lomiga e sosoo ai).

ASO 6 OKETOPA ASO SA 27 TAUSAGA MASANI:

Faitauga muamua: Sapakuka 1: 2 – 3, 2: 2- 4. Matua: O lē ua amio tonu e ola ia i lona fa'atutuua.

Salamo: 95: 1 – 2 (tali), 6 – 7 (tali), 8 – 9 (tali). Tali: O le aso nei afai tou te fa'alogo i lona si'ufogaga, aua ne'i fa'ama'a'a o outou loto.

Faitauga lona lua: 2 Timoteo 1: 6 – 8, 13 - 14. Matua: Aua e te mā i le molimauina i lō tatou Ali'i.

Aleluia, Aleluia...Le Ali'i e, ia e tatalaina o matou loto ia naunau i afioga a lou Alo...Aleluia.

Evagelia – Luka 17: 5 – 10. Matua: Anafai ua tusa lo outou fa'atutuua.

Tofitofiga O le Upu:

E fiafia lava Paulo e va'ava'a'i iā ia o se tagata e avatu ni fautuaga - po'o ni fa'atonuga – ia Timoteo, ma e le māasiasi e avatu o ia lava o se fa'ata'ita'iga. Ona o Paulo ua mautinoa atoatoa o mea uma ua iā ia o ni meaalofa, ma o mea uma ia Timoteo ua tu'uina atu i ai o se meaalofa: o lenei mea e le o maua'a i se malosi fa'aletagata po'o se leleiga. Pau le malosi'aga ia Timoteo e fa'amoemoe i ai – le malosi e sau mai le fa'atutuua ma le alofa ia Iesu Keriso. I le evagelia ua talanoa mai Iesu i le fa'atutuua – ma o lo'o tautala i upu e lu'iina ai i latou sa fa'alogologo e tauave le fa'atutuua ma le loto atoa. O se āta ua ofoina mai e Iesu i le va feagai a le matai ma lana 'au'auna ose lu'itau, ma e matuiā. Ae o lo'o ofoina mai ai se āta moni o le mafutaga i le va o le Atua ma le tagata. E mafai ona mafana le ola ai i se olaga fa'aKerisiano ma se agaga maumautū o le fa'atinoina o le fa'atutuua, olaga lelei, fa'atinoga o faigataulaga o ni mea ia ua tatou faia mo le Atua, ma o se manatu la ua tatou fa'atalitali i le Atua e tauia i ni auala talafeagai. E fa'apenā ona galue lenei lalolagi – ma e fa'apenā ona faia e tagata. Ae o le mafutaga i le va o le tagata ma le Atua e le o se mafutaga a nisi e tutusa, ose mafutaga ua fa'avae atoa i luga o le fa'amaonia o le tulaga a le Atua. Ioe e taūa le fa'aihoa o le ā se tali a le tagata ile Atua i vaega tau i le olaga lelei, faigataulaga po'o le fa'atutuua e masani o galuega a le kalasia. O le Atua o le 'au'auna i taimi uma – ae o lenā mafutaga fa'anatura ua suia e le tasi na fa'apea mai: Ou te le ta'ua outou o 'au'auna, a o uō (Ioane 15: 15). Ua aumai fo'i se faitauga mai ia Sapakuka o lē na tusia i taimi o fa'aletonu ma mala, ua tautala i upu a tagata ua fa'aletonu, ma ua ia ofo atu upu o le fa'amoemoe – ae o le fa'amoemoe ua ia avatu e mo latou o lo'o tauis pe le fa'atutuua. I faitauga o le asō ua vala'auina i tatou ina ia su'esu'e po'o le a le uiga pe a tatou talanoa i le fa'atutuua, ma na iloa ai o lea fa'atutuua e lē o se mea e mafai ona u'u, ae ose gaioiga lu'itau malosi ua vala'auina ai i tatou e ulufale atu ia e aunoa ma lo tatou iloaina po'o fea e aga'i i ai.

16

Metitasio Aso Sa 6 Oketopa.

Fa'atuputeleina lo tatou Fa'atutuua

O le fa'atutuua e lē na'o se elemeni tumau o lo tatou ola fa'aleagaga; ae o se malosi sili ona mautū, e sili atu ona mamao nai lo fa'amafanafanaga ma kalasia fa'apitoa. Na ta'ua e Sagato Peteru, ina ua uma ona fa'aalia le Afioa'e o Iesu i le lagi, lea na ia maua ai le avanoa e molimau ai, fa'apena foi i le siufofoga fa'alelagi, le siufofoga o le Tamā, lea na fa'alogo i ai ona taliga i luga o le mauga o Kilepoa, ua fa'amautinoa mai ai ia i tatou, e ui i mea uma, e i ai se mea e sili atu ona tumau ma mautinoa: E maua le tatou fa'amaoniga o nei mea na ta'ua i valoaga (2Pt1: 19), o le upu na fa'aihoa o le fa'atutuua lea.

O le mea moni, o le fa'atutuua o se mea e sili atu ona mausali ma sili atu lona malupupiuia nai lo le fa'aali mai o lo tatou Ali'i ia i tatou ma lana fetalaiga ia i tatou ... O ai e lē manatu i se fa'aaliga va'aia o le a sili atu ona taūa i le olaga fa'aleagaga? Ae ui i lea, ou te toe fai atu o le sulumalama o le fa'atutuua e sili atu ona mausali ma sili atu le mautinoa nai lo se fa'aaliga vaaia ... Ou te manatua se tagata na o'o i se tulaga maualuga lana tatalo e ala i lenei faiga faigofie. Sa ia fai ifo ia te ia lava, "Afai ou te va'ai i lo tatou Alii, o le a la'u tāga a fai? O le a la'u tala o le a fai atu ia te ia? O le a se gaioiga ou te faia? Ona fai atu lea o ia ma lona fa'atutuua malosi, "Ou te lē'o va'ai ia te ia i o'u mata, ae o le fa'atutuua ua fa'amautinoa mai ai ia te au o lo'o afio ia i le tapenakulo. O lenei, afai o lo'o ma fa'afesaga'i, ou te fia faia se gaioiga e tatau ona ou lagonaina, se tala e fai atu ma se mea ou te faia, e pei o lagona ma tala ma gaioiga e faia pe a ou va'ai moni ia te ia i o'u mata fa'aletagata. "O lea, na si'iitia ai lona fa'atutuua ma fa'afaigofie ai le la so'otaga ma le Atua ...

E mafai ona fa'afaigofie le faiga o tatou tatalo? Ona tatau lea ona tu'uina atu atoa i tatou i ai. Pe ua tumu ea o tatou agaga i lea malamalama? Ona tatau lea ona tatou seleselina, ina ia susulu atu o tatou agaga. I lena lava taimi, peita'i, tatou te misia ea nei mea uma? Ona 'aua lea nei seūa lo tatou filemū, auā e mafai ona lavātia e le fa'atutuua i se auala e tatau ai ona tatou migoi i le asō e pei ona tatou gaioi ai ananafi. O ananafi na tatou alolofa ai i le Atua i le malamalama ma le fiafia; i le asō ia tatou alolofa ia te ia i le pogisā ma le matūtū fa'aleagaga. Afai ua iā i tatou le mautinoa o lona alofa ananafi, e tatau foi ona tatou maua i le asō. O lona alofa e lē fa'alagolago i suiga o tatou loto, pe suia ea ona ua suia o tatou uiga lelei. O lona alofa e tumau e fa'avavau lea.

ASO 13 OKETOPA ASO SA 28 TAUSAGA MASANI:

Faitauga muamua: 2 Tupu 5: 14 – 17. Matua: Ua fai mai Na’amanu i le tagata o le Atua.

Salomo: 98: 1 (tali), 2 – 3 (tali), 4 (tali). Tali: Ua fa’ailoa mai e le Ali’i o lana lava fa’aoletaga.

Faitauga lona lua: 2 Timoteo 2: 8 – 13. Maua: Pe afai tatou te onosa’i, e fai fo’i i tatou ma tupu fa’atasi ma ia.

Aleluia, Aleluia...Ia fa’apupulaina mata o tatou loto e le Tamā o lo tatou Ali’i o Iesu Keriso, ina ia tatou iloa le uiga o le fa’amoemoe ua i lona vala’au mai...Aleluia.

Evagelia: Luka 17: 11 – 19. Matua: Ua le iloa ea ni e toe fo’i mai e vivi’i i le Atua, na o lenei tagata ‘ese.

Tofitofiga o le Upu:

I tausuaga masani a tatou tu’ua’ia se tagata o se ‘lepela’ tatou te le o fa’aogaina upu fa’afoma’i ae o se manatu tau fa’alaua’itele: ua fa’ate’i ‘ese mai fa’apotopotoga a tagata laua’itele. O lenei faiga o se faiga autū ona o se manatu i matafaioi a lepela i se aganu’u ua maua mai ai le fa’aogaina o le upu mai tusitusiga pa’ia. I le Feagai-ga Tuai o le ‘ma’i lepela’ o se upu laua’itele ua fa’aoa e le to’atele mo fa’ama’i ‘ese’ese o le tino. O le tusi a Levitiko (mataupu 13 & 14) o lo’o tau’avea ni fa’atulafonoina tetele i le gafa ai ma le ma’i o le lepela, ona o le fa’ama’i e feso’ota’i fa’atasi ma le lepela ua va’aria o se mea ua avea ai le tagata e lē mamā ma e mana’omia ai ona vavae’ese mai le fa’apotopotoga masani a tagata. O le avea ma lepela ua fa’aaunu’ua ai, se isi ua te’ea ma e lē faitaulia fo’i i mea fai a le sosaiete. Ae maofa ai ona o Na’amanu ma le lepela na toe fo’i mai e avatu le fa’afetai o ni tagata mai nu’u ‘ese. O lona uiga o la’ua e lē o ni veaga o tagata o le nu’u – o la’ua o ni tagata mai nu’u ‘ese – o le tulaga o nisi fa’apitoa na talia le alofa o lona uiga e taūa. Ua tatou iloa lo la’ua fa’amaloloina o se fa’ailoga o le va’ai alofa a le Atua e lautele atu i lo si’osi’omaga a sosaiete ua talia – atonu o se fa’amanatu i fa’apotopotoga Kerisiano o a ‘tatou’ fa’atulagaga po’o ai e totino, masalo ua ova puipuia. E ao fo’i ona maitauina o le fa’amaloloina o nei tagata ‘ese e to’alua ua aumai ai le fa’aliliuga. Na ave e Na’amanu le palpala mai Isarael i Suria ina ia faia ai sana faitaulaga i le Atua a Isarael; o le Samaria na fa’apa’ū i vae o Iesu ma vivi’i i le Atua - o la’ua uma e to’alua na fa’ailoa o le mea na tupu o se gaioiga a le Atua ma e mana’omia se tali atu ma le fa’atuatua. O le vala’aulia mo i latou na fa’alogologo i nei faitauga ina ia manatunatu i le a’afiaga o se tagata ‘ese mai fafo ma fa’ailoa o latou fo’i, e ala i le agasala, o tagata ua i fafo atu. Ae e pei o Na’amanu ma le lepela Samaria ua aumai i tagata o le Atua i se gaioiga o le alofa. O le tali atu i ai o le tali o le fa’atuatua ma le liliu fa’aaauau. E pei ona fa’amanatu mai e Paulo ia i tatou: Atonu tatou te lē fa’amaoni, ae e fa’amaoni lava o ia. E pei ona tu’itu’i mai pea Pope Faranisisi, o le alofa o le Atua e fa’aa-vanoa pea mo i tatou e pei ona fa’avanoa mo Na’amanu ma le Samaria lepela.

Metitasio Aso Sa 13 Oketopa

Ina ua o’o atu o ia i se tasi o nu’u ...

O se loto salamō e lē fuafuaina pe mafaufauina o se fa’atinoga a se tagata lava ia. E lē o se mea foi na uīa i le savaliga o le olaga. Atonu e i ai taimi o gaioiga, ae faigatā ona fuafua. O le tele o agaga latou te leiloa seiloga e latalata ina tupu se mea, o lo’o latou aga’i i le auala o le salamō. E lē o se mea e masani ona maua, ae, e foliga mai na te sa’ili ni agaga. O le alofa ma le mua’i tōfiga a le Atua o lo’o pipi’i ai lava i tua. E pei lava o lo’o taula’i atu ona mata i luga o ni agaga fa’apitoa, ma va’aria i latou mo sina taimi, a’o le’i tulimata’iina i latou o se sala o lona alofa.

O le mea moni, o le salamō e lē mafai ona tupu fa’afuase’i, pe sau mai i se mea e leiloa, e tusa lava pe foliga mai e tutuina se afi fou i totonu o se tagata. O le tofi natia o le a’ao o le Atua e masani ona galue mo se taimi e leiloa; o le pa’i lilo a le Atua ua uma ona fa’ata’atia i luga o le agaga; o le suluina o le agaga e amata ona faia i totonu o ona itula lafoia, o nisi taimi e umi po’o le faitau tausaga foi. O nei ulua’i manatu, na ona fa’asino atu le taūa i le moni o se salamō matuiā. E feiloa’i le Atua ma se agaga i se aualakolosi o le olaga ma i se auala e lē fuafuaina e mafai ai ona va’aria lona tino moni. O se feiloaiga fa’aletagata ma le misitelio moni o le Atua lava ia o le fatu lea o so’o se salamō mata’utia.

ASO 20 OKETOPA ASO SA 29 TAUSAGA MASANI:

Faitauga muamua: Esoto 17: 8 – 13. Matua: A si’i i luga e Mose lona lima, mālō atu ai lea o Isaraelu.

Salomo: 121: 1 – 2 (tali), 3 – 4 (tali), 5 – 6 (tali), 7 – 8 (tali). Tali: O lō tatou fesoasoani mai le Ali’i lea, o lē na faia le lagi atoa ma le lalolagi.

Faitauga lona lua: 2 Timoteo 3: 14 – 17; 4: 1 – 2. Matua: Ia atoatoa ona lelei le tagata o le Atua, ia sauni lava ia i galuega lelei uma lava.

Aleluia, Aleluia – Ia fa’apupulaina mata o tatou loto e le Tama o lo tatou Ali’i o Iesu Keriso, ina ia tatou iloa le uiga o le fa’amoemoe ua i lona vala’au mai...Aleluia.

Evagelia – Luka 18: 1 – 8. Matua: Pe le faia ‘ea e le Atua le fa’amasinoga mo e o lo’o alalaga ia te ia?

Tofitofiga ole Upu:

E tele tagata sa maua i ni a’afiaga o le tatalo e pei o la e talanoa i se nofoaga e leai se isi o i ai. E masani ona fa’alogoina tagata o talanoa iā latou tatalo e lē taliaina, ma le Atua e le tali mai pe a mana’omia o ia. E taūna na amata a’oa’oga a Iesu i le tatalo i le fa’amatala i ona so’o e tatalo i taimi uma. O le mea lea e ta’u mai o le tatalo e lē o le ‘taimi nei’ po’o ‘pe a talafeagai ma lagona’ po’o ‘pe a ou mana’o i se mea. E to’atele tagata i le Ekalesia ua foa’i o latou ola ma tu’u atu atoa o latou malosi i galuega mo le faimeatonu: ua pei latou o le vitua na va’aria lona taumafai. O le fa’atuatuaga Kerisiano ua a’oa’oina o le Atua e mānā’ona’o mo le lelei mo tagata uma, ma o lo’o silafiana e le Atua mea uma ma o ia o le pule aoao; o le mea lea o tatalo e lē o se fa’atauanau o se fa’amasino e lē faimeatonu ma e lē ano mai fo’i. O tatalo o vaega e alagatatau mo le fa’aso’oina Kerisiano – o le i ai i le afio ai o le Atua, ma tu’u pea le Atua e avea ma Atua. E pei o Mose i le faitauga muamua ua na ona tūtū ma sisi’i ona lima, ua na ona tu ai fa’apenā i i’inā. Ma e taūna le mana’omia e Mose le fesoasoani a isi – Arona ma Huro – o se faiga e mana’omia ai le fa’apotopotoga. O le mafuaga lea i masani Katoliko o le fa’apotopotoga e vala’auina pea e tatalo mo le aso atoa, po’o tatalo e tolaulauina e isi, tagata lotu po’o nofo voto; po’o le vala’au a le Agelu i taimi o le aso, le taeao ma le afiafi, ma le fa’aaauauina pea o le faitaulaga o le Eukalisitia. Atonu o le Ekalesia āoāo o le masiofo a Keriso, ae ua vala’auina fo’i o ia e avea ma vitua ua fa’atauanau pea.

18

Metitasio Aso Sa 20 Oketopa:

Tatalo e lē Aunoa

O afea tatou te fa’atali ai i le Atua, o ia o le alofa? Auā o ia o le alofa ma sa’ili le alofa. O le alofa e leiloa pe fa’apefea ona fa’atali e le’o se alofa. O le alofa o le ofoina atu o i tatou lava. E lē gata mo sina vaega o le olaga atoa, pe o se vaega foi o lona malosiaga: o le alofa ma sa’ili, o le foa’i atoa o le tagata lava ia. O le alofa e fa’avae i luga o le avafatafata. Tatou te alolofa na’o mea tatou te fa’ataūaina ma fa’amemelo i ai. E na’o le “lelei” tatou te alolofa i ai. O se mea e faigofie ma vave ona o’o mai e lē tosina i ai le loloto o le agaga. O le a avea o se lelei papa’u, e lē mafai ona fa’amalieina ai le tulaga tau ‘oa o lo latou natura ... O se tulafono i le ‘oa taūna moni e matuā loloto le mea e tanu ai, ma fa’aeete ona nanā; o lena fa’aoaloāga taūna e maua i le tele o taumafaiga fitā ...

O le Atua o le ‘oa e sili atu nai lo se tau. Afai o le a faigofie ona tu’uina atu ia lava, e o’o lava i e sili o le a fulitua i latou ia te ia. Na tu’uina mai e Sagato Ioane Climacus se mafua’aga talitutusa, ae na i ai sina eseesega manaia. Fai mai a ia, o le “Tatalo”, “o se gaoioiga e tālaulau ma tamaoaiga tele. O se punavai o le fatufa’avae, i le fa’amalieina, fa’apea gasologa o so’o se mea fa’aleagaga.” E fa’amalosia e le Atua ia fai pea ma le filigā mautinoa i le tatalo ina ia fa’ateleina ai lo tatou lelei. O le faiāga i le tu’ufa’atasia e le’o se taimi ma’imau; e vala mamao. O le Atua e silasila mamao; na te fa’aaoga lelei mea tatou te ta’ua o le leaga - o a tatou feoā’iga, o tatou uiga lēmautonu ma ala’alo, na te lē alofagia pe manaomia i tatou. O taimi nei, ua sili atu i mea uma, tatou te mana’omia le talitonu mautinoa ma le fa’amaoni. O le tatalo, pe mo i tatou pe mo nisi foi, ‘aua le loto-vaivai, o lo’o tumau pea ma fesi’oa’i le lagi, ia pa’i atu i le finagalo o le Atua; ma o le mafua’aga lena na ia fetalai mai ai, ia tatou lototetele.

FAITAUGA MO LE MASINA O OKETOPA – 2019

ASO 27 OKETOPA ASO SA 30 TAUSAGA MASANI:

Faitauga muamua: Sirako 35: 15 – 17, 20 – 22.

Matua: E alu a'e i luga o ao le tatalo a lē fa'amaulalo iā te ia.

Salamo: 34: 1 – 2 (tali), 16 – 17 (tali), 18, 22 (tali). Tali: E fa'afogofa mai le Ali'i i le tagata ua tigāina.

Faitauga lona lua: 2 Timoteo 4: 6 – 8, 16 – 18. Matua: Ua teuina mo a'u le pale o le amiotonu.

Aleluia, Aleluia...Fetalai mai ia, le Ali'i e, auā o lo'o fa'alogologo atu lau auauna; o iā te oe upu o le ola e fa'avavau... Aleluia.

Evagelia: Luka 18: 9 – 14. Matua: Ua alu ifo le tagata ao lafoga i lona fale, ua ta'uamionuina, ae lē fa'apea le Farasaio.

Tofitofiga o le Upu:

O le vaiaso lenei ua aumai ai e Iesu se fa'ataoto lona lua i tatalo. O tatalo e uiga i le Atua, ae le o le tagata o lo'o tatalo – e ui o lenā tagata o se vaega o le fetaia'i.

O le Farasaio ua tu'uina atu se fa'amatalaga o ana mea na fai ma o lo'o autū ana 'tatalo' iā ia lava. O le ao lafoga e pu'upu'u lava, talanoa sa'o i le Atua ma fa'ailoa lona mana'omia o le alofa o le Atua. Ina ua a'oa'o atu Iesu i le 'au so'o i le tatalo o le 'Matou Tamā' sa ia avatu se tatalo e uiga i le Atua. E fa'apea a patipatia e le Ekalesia le Misasa, ua ofoina atu se tatalo sili ua autū atoatoa i le Atua. Ina ia asia ma talatala le sauniga Kerisiano o le Eukalisitio o se galuega tatau i le a'oa'olina pe fa'apefea se va'aiga i tatalo, ona o le Misasa o se taulaga i le Tamā i le Alo i le malosi a le Agaga Pa'ia. E le potopoto tagata Kerisiano i aso Sa mo vi'ivi'iga e toe manatu i mea sa latou faia, ae ina faia le manatuaina o mea na faia e le Atua ma mea o lo'o ia faia ma sa'ilī ina ia tosina latalata atu i ai.

O le *Apologia* (fa'ato'esega) matagofie a Paulo o lo'o fa'aalia mai ai se autu e tasi: o se taumauga atoatoa i le Ali'i ma le fa'amaoni atoatoa i lana vala'au mai.

O le tauiviga ma faigatā na feagai ma Paulo na fa'atupulia ai lona fa'atuatua – e o'o lava ina ua leai se lagolago mai a lana fa'apotopotoga. Atonu o fa'apotopotoga e fa'alogi i nei upu e taumafai e lagolago ma fesoasoani atu iā i latou o lo'o tauivi ma a latou fitā ma fa'afitauli ma avega mamafa o lo'o tauave ma fa'amalosi'au iā i latou i lo latou fa'atuatua.

Metitasio Aso Sa 27 Oketopa:

'Aua le fefe e sa'ili le alofa tunoa.

Ua amata ona togafititia oe e le fomai sili ona lelei, auā o ia e leai se fa'ama'i e lē mafai ona togafititia. 'Aua e te fefe i ou vaivaiga leaga ua tuana'i, e tusa lava po'o le a le taufa'afefe, pe o le a le lētalitonuina o mea na e faia. Po'o a ia fa'ama'i ogaoga, ae ua puleaina uma e le foma'i. O lea 'aua e te popole i agasala ua tuana'i; e tasi lava le taimi o le sakalameta ona fa'amagaloina ai lea, ma o le a matuā fa'amagaloina uma i latou. Fa'alogi foi i le tala a le Au Apostolo e uiga i lenei mataupu iā i latou na fa'asatauroina le Ali'i: *E tatau ona outou salamō ma outou uma taitoatasi e tatau ona papatisoina i le suafa o Iesu Keriso mo le fa'amagaloina o a outou agasala* (Galuega 2:38). Na tupu; na papatisoina i latou, ma latou talitonu, na latou fa'alatalata atu i le Tino o le Alii, ma latou o atu ma feinu i le toto na latou fa'amaligiina. Mo i latou uma ua fa'amagaloina agasala mai lē na te fa'amagaloina agasala, o ia na te lē vi'ia agasala, o le na sau e lē vala'au e amiotonu, ae o e agasala

O le mea na tupu ua uma; e lē mafai ona e faia ni galuega ua tuana'i e le'i faia; ae mo galuega i le lumana'i, ua ia te oe le mana malosi e te lē faia ai. Aiseā la e fa'a'ole'ole ai i lenei finauga valea a le tiapolo? Latou te fefefe i agasala o taeao lea latou te lē'i faia; latou te lē fefefe i agasala ua te'a, na latou faia ae o lo'o latou feōma'i fa'atasi pea ma i latou. E te le'i faia na mea, o ia mea ua uma ona latou fa'amamafa ia te oe. Masalo e te le'i faia ia mea, e moni lava pe afai e te lē manao e fa'amautinoa ete le'i faia; e pei o nei sēsē, ae afai e te mana'o i ai e mafai ona fa'aumatiā i latou. "E te lē mafaiia," o lau tala lea. Sau i le alofa tunoa. Ina ua uma, ona e maua lea o le malosi, auā ua tusia, *na ia tu'uina atu [ia i latou] le malosi e avea ai ma fanau a le Atua* (Ioane 1:12). Ia amata nei loa ona avea oe ma ana fanau O fea na amata ai ona avea oe ma pologa, ia fa'atulaga lou agaga i le avea ai ma atali'i po'o se afafine. Fa'aolaina nei oe lava mai agasala o lo'o e tauavea pea

Ae a fa'afouina oe e ala i le fa'amagaloina o agasala, ma fa'amagaloina foi au agasala uma sa faia, afai foi e te maua se taimi umi i lalo nei, ola ina ia mulimuli i au galuega lelei e ala i lou fa'atuatua. Ola e tusa ai ma le tagata ua avea ai oe, o se tamaititi i le aiga, o se tamā silisili ma se ulu o le aiga, o lē na vaeluaina i ai le suafa o le Atua.

FAITAUGA MO LE ASO SA MUAMUA O NOVEMA – 2019

Aso Sa 31 Tausaga Masani: Faitauga muamua: Poto 11: 23 – 27; 12: 1 – 2.

Matua: Ua e alofa i mea uma lava.

Salamo: 145: 1 – 2 (tali), 8 – 9 (tali), 10 – 11 (tali), 13 – 14 (tali). Tali: Lo'u Atua e, le Tupu, 'ou te fa'ane'ene'e iā te oe.

Faitauga lona lua: 2 Tesalonia 1: 11 – 12; 2: 1 – 2. Matua: Ia vi'ia ona o outou le suafa o lo tatou Ali'i o Iesu Keriso.

Aleluia, Aleluia... Ia outou mataala, auā tou te lē iloa po o le fea aso e sau ai lo outou Ali'i... Aleluia.

Evagelia: Luka 19: 1 – 10. Matua: Ua sau le Atali'i o le tagata e saili ma fa'aola i lē na lēiloa.

1st. Sunday	0.8.30am	Strathmore	Patele Tuli
Aso 6 Oketopa 2019	11.30am	Titahi Bay	Patele Andrew/Tuli
2nd. Sunday			
Aso 16 Oketopa 2019	11.30	Naenae	Patele Maleko
	12.00	Taita	Patele Tuli
3rd. Sunday			
Aso 20 Oketopa 2019	11,00	Porirua	Patele Andrew
	11.00am	Newtown	Patele Tuli
	11.30am	Wainuiomata	Leai se Misasa
4th. Sunday			
Aso 20 Oketopa 2019	11.00am	Lower Hutt	Patele Maleko
	11.30	Stokes Valley	Patele Andrew/Tuli

20

Aso To'ona'i 5 Oketopa Tafaoga A'oga Aso Sa

Aso 7 Oketopa Fono Autalavou @ 6.30pm

Aso Faraile 11 Oketopa Fonotaga Kapelanisia @ 6.30pm

Aso Gafua 14 Oketopa Fonotaga Aoga Aso Sa @6.30pm

Aso To'ona'i 19 Oketopa Ta'aloga Autalavou